

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय आरण्यकम्

प्रपाठकः 7 - 8

Table of Contents

7 कृष्ण यजुर्वेदीय तैत्तिरीय आरण्यके प्रथमः प्रपाठकः	7
7.1 सप्तमः प्रपाठकः	7
अनुवाकं-1	7
अनुवाकं-2.....	8
अनुवाकं-3.....	10
अनुवाकं-4.....	11
अनुवाकं-5.....	12
अनुवाकं-6.....	15
अनुवाकं-7	16
अनुवाकं-8.....	18
अनुवाकं-9.....	19
अनुवाकं-10.....	21
अनुवाकं-11	23
अनुवाकं-12.....	26
अनुवाकं-13.....	26
अनुवाकं-14.....	27

अनुवाकं-15.....	27
अनुवाकं-16.....	27
अनुवाकं-17.....	28
अनुवाकं-18.....	28
अनुवाकं-19.....	28
अनुवाकं-20.....	29
अनुवाकं-21.....	31
अनुवाकं-22.....	31
अनुवाकं-23.....	32
अनुवाकं-24.....	32
अनुवाकं-25.....	32
अनुवाकं-26.....	32
अनुवाकं-27.....	33
अनुवाकं-28.....	33
अनुवाकं-29.....	34
अनुवाकं-30.....	34
अनुवाकं-31.....	34
अनुवाकं-32.....	34

अनुवाकं-33.....	35
अनुवाकं-34.....	35
अनुवाकं-35.....	35
अनुवाकं-36.....	35
अनुवाकं-37.....	36
अनुवाकं-38.....	36
अनुवाकं-39.....	36
अनुवाकं-40	37
अनुवाकं-41.....	37
अनुवाकं-42	39
Appendix (of expansions).....	46
8 कृष्ण यजुर्वेदीय तैत्तिरीय आरण्यके अष्टमः प्रपाठकः	51
8.1 अष्टमः प्रपाठकः	51
अनुवाकम् - 1	51
अनुवाकम् - 2	54
अनुवाकम् - 3	59
अनुवाकम् - 4.....	63
अनुवाकम् - 5.....	68

अनुवाकम् - 6.....	70
अनुवाकम् - 7.....	75
अनुवाकम् - 8.....	81
अनुवाकम् - 9.....	87
अनुवाकम् - 10.....	91
अनुवाकम् - 11.....	94
अनुवाकम् - 12.....	96



ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय आरण्यके प्रथमः प्रपाठकः

7.1 सप्तमः प्रपाठकः

अनुवाकं-1

T.A.7.1.1

नमो॑ वा॒चे या॑ चो॒दिता॑ या॒ चानु॑दिता॒ तस्यै॑ वा॒चे नमो॑ नमो॑ वा॒चे नमो॑
वा॒चस्प॑तये॒ नम ऋ॑षिभ्यो॒ मन्त्र॑कृद्भ्यो॒ मन्त्र॑पतिभ्यो॒ मा मामृ॑षयो
मन्त्र॑कृतो॒ मन्त्र॑पतयः॒ परा॑दु॒र्माऽह॑मृषीन्॒ मन्त्र॑कृतो॒ मन्त्र॑पतीन्॒ परा॑दां
वैश्व॑देवीं॒ वाच॑मुद्यास॒ शिवा॑मदस्ताम्॒ जुष्टा॑म् दे॒वेभ्यः॑ शर्म॒ मे द्यौः॑
शर्म॑ पृथि॒वी शर्म॑ विश्व॒मिद॑म् जगत् । शर्म॑ चन्द्रश्च॒ सूर्य॑श्च शर्म॒
ब्रह्म॑प्रजापती । भू॒तं व॑दिष्ये॒ भुव॑नं व॒दिष्ये॒ तेजो॑ वदिष्ये॒ यशो॑ वदिष्ये
तपो॑ वदिष्ये॒ ब्रह्म॑ वदिष्ये॒ सत्यं॑ व॒दिष्ये॒ तस्मा॑ अ॒हमि॑द-मु॒पस्तर॑ण-
मु॒पस्तृ॑ण॒ उप॑स्तरणम्॒ मे प्र॒जायै॑ पशू॒नाम् भू॒या-दु॒पस्तर॑णमहम्
प्र॒जायै॑ पशू॒नाम् भू॒यास॑म् प्राणा॒पानौ॑ मृत्यो॒र्मा पा॑तम् प्राणा॒पानौ॑
मा मा॑ हा॒सिष्ट॑म् मधु॒ मनि॑ष्ये॒ मधु॑ जनिष्ये॒ मधु॑ वक्ष्यामि॒ मधु॑

वदिष्यामि मधुमतीम् देवेभ्यो वाचमुद्यासञ् शुश्रूषेण्याम्
 मनुष्येभ्यस्तम् मा देवा अवन्तु शोभायै पितरोऽनुमदन्तु ।
 ओम् शान्तिः शान्तिः शान्तिः । 1(4) (A1)

अनुवाकं-2

T.A.7.2.1

युञ्जते मन उत युञ्जते धियः । विप्रा विप्रस्य बृहतो विपश्चितः ।
 वि होत्रा दधे वयुनाविदेक इत् । मही देवस्य सवितुः परिष्टुतिः ।
 देवस्य त्वा सवितुः प्रसवे । अश्विनोर् बाहुभ्याम् ।
 पूष्णो हस्ताभ्यामाददे । अभिरसि नारिरसि ।
 अद्ध्वरकृद्-देवेभ्यः । उत्तिष्ठ ब्रह्मणस्पते । 2 (10)

T.A.7.2.2

देवयन्तस्त्वेमहे । उप प्रयन्तु मरुतः सुदानवः । इन्द्र प्राशूर्भवा
 सचा । प्रैतु ब्रह्मणस्पतिः । प्र देव्येतु सूनृता ।
 अच्छा वीरन्नर्यम् पङ्क्तिराधसम् । देवा यज्ञन्नयन्तु नः ।
 देवी द्यावापृथिवी अनु मे मञ्साथाम् । ऋद्ध्यसासमद्य ।
 मखस्य शिरः । 3 (10)

T.A.7.2.3

मखाय॑ त्वा । मखस्य॑ त्वा शी॒र्ष्णे । इयत्यग्र॑ आसीः । ऋद्ध्य्यास॑मद्य ।
मखस्य॑ शिरः । मखाय॑ त्वा । मखस्य॑ त्वा शी॒र्ष्णे । देवी॑र् व॒प्त्रीरस्य॑
भूतस्य॑ प्रथमजा ऋतावरीः । ऋद्ध्य्यास॑मद्य । मखस्य॑ शिरः । 4 (10)

T.A.7.2.4

मखाय॑ त्वा । मखस्य॑ त्वा शी॒र्ष्णे । इन्द्रस्यौजो॑ऽसि । ऋद्ध्य्यास॑मद्य ।
मखस्य॑ शिरः । मखाय॑ त्वा । मखस्य॑ त्वा शी॒र्ष्णे । अग्निजा॑ असि
प्रजापते॑ रेतः । ऋद्ध्य्यास॑मद्य । मखस्य॑ शिरः । 5 (10)

T.A.7.2.5

मखाय॑ त्वा । मखस्य॑ त्वा शी॒र्ष्णे । आयुर् धेहि॑ प्राणम् धेहि॑ ।
अपानम् धेहि॑ व्यानम् धेहि॑ । चक्षु॑र्धेहि॑ श्रोत्रं धेहि॑ । मनो॑ धेहि॑ वाचं
धेहि॑ । आत्मानं॑ धेहि॑ प्रतिष्ठां धेहि॑ । मां धेहि॑ मयि॑ धेहि॑ ।
मधु॑ त्वा मधुला॑ करोतु । मखस्य॑ शिरो॑ऽसि () । 6 (10)

T.A.7.2.6

यज्ञस्य॑ पदे स्थः । गायत्रेण॑ त्वा छन्दसा॑ करोमि । त्रैष्टु॑भेन त्वा
छन्दसा॑ करोमि । जागतेन॑ त्वा छन्दसा॑ करोमि । मखस्य॑ रास्ना॑ऽसि ।

अदितिस्ते बिलङ्गहातु । पाङ्केन छन्दसा । सूर्यस्य हरसा श्राय ।
 मखोऽसि । 7 (9) (पते – शिर – ऋतावरीर्. ऋद्ध्यासमद्य मखस्य
 शिरः – शिरः – शिरोऽसि – +नव च) (A2)

Special Korvai

(इयति देवीरिन्द्रस्यौजोऽस्यग्निजा अस्यायुर्द्धेहि प्राणम् पञ्च)

अनुवाक-3

T.A.7.3.1

वृष्णो अश्वस्य निष्पदसि । वरुणस्त्वा धृतव्रत आधूपयतु ।
 मित्रावरुणयोर् ध्रुवेण धर्मणा । अर्चिषे त्वा । शोचिषे त्वा ।
 ज्योतिषे त्वा । तपसे त्वा । अभीमम् महिना दिवम् ।
 मित्रो बभूव सप्रथाः । उत श्रवसा पृथिवीम् । 8 (10)

T.A.7.3.2

मित्रस्य चर्षणीधृतः । श्रवो देवस्य सानसिम् ।
 द्युम्नञ्चित्रश्रवस्तमम् । सिद्ध्यै त्वा । देवस्त्वा सवितोद्वपतु ।
 सुपाणिः स्वङ्गुरिः । सुबाहुरुत शक्त्या । अपद्यमानः पृथिव्याम् ।
 आशा दिश आ पृण । उत्तिष्ठ बृहन् भव । 9 (10)

T.A.7.3.3

ऊ॒र्ध्व॑स्तिष्ठ॒ ध्रु॑वस्त्वम् । सूर्य॑स्य॒ त्वा च॑क्षु॒षाऽन्वी॑क्षे ॥ ऋ॒जवे॑ त्वा ।
सा॒धवे॑ त्वा । सु॒क्षित्यै॑ त्वा भू॒त्यै त्वा ॥ इ॒दम॑हम॒मुमामु॑ष्यायणं॒ विशा॑
प॒शुभिर् ब्र॑ह्मव॒र्चसे॒न पर्यू॑हामि । गा॒यत्रे॑ण॒ त्वा छ॑न्दसा॒ ऽऽच्छृ॑णद्मि ।
त्रै॒ष्टुभे॑न॒ त्वा छ॑न्दसा॒ ऽऽच्छृ॑णद्मि । जा॒गते॑न॒ त्वा छ॑न्दसा॒ ऽऽच्छृ॑णद्मि ।
छृ॒णत्तु॑ त्वा वाक् () । छृ॒णत्तु॑ त्वोर्क् । छृ॒णत्तु॑ त्वा ह॒विः ।
छृ॒न्धि वा॑चम् । छृ॒न्ध्यूर्ज॑म् । छृ॒न्धि ह॒विः ।
दे॒व पुर॑श्चर॒ सघ्या॑सन्त्वा । 10 (16)

(पृथि॑वीम् - भ॒व - वा॒ख् षट्च॑) (A3)

अनुवाकं-4

T.A.7.4.1

ब्र॒ह्मन् प्र॑वर्ग्येण॒ प्रच॑रिष्यामः । हो॒तर् घ॒र्मम॑भिष्टुहि । अ॒ग्नी॒द्रौहि॑णौ
पु॒रोडा॑शावधि॒श्रय॑ । प्र॒तिप्र॑स्थात॒र्विह॑र । प्र॒स्तोतः॑ सा॒मानि॑ गाय ।
य॒जु॒र्युक्त॑ साम॒भिरा॑क्त॒खन्त्वा॑ । वि॒श्वैर् दे॒वैरनु॑मतम् म॒रुद्धिः॑ ।
दक्षि॑णाभिः॒ प्रत॑तम् पार॒यिष्णु॑म् । स्तु॒भो वह॑न्तु सु॒मन॑स्य॒मानम्॑ ।
स नो॑ रु॒चन्धे॑ह्यह॒णीय॑मानः () । भूर्भु॑वस्सु॒वः ।

ओमिन्द्रवन्तः प्रचरत । 11 (12) (अहणीयमानो द्वे च) (A4)

अनुवाकं-5

T.A.7.5.1

ब्रह्मन् प्रचरिष्यामः । होतर् घर्ममभिष्टुहि । यमाय त्वा मखाय त्वा ।
सूर्यस्य हरसे त्वा । प्राणाय स्वाहा व्यानाय स्वाहा ऽपानाय स्वाहा ॥
चक्षुषे स्वाहा श्रोत्राय स्वाहा ॥ मनसे स्वाहा वाचे सरस्वत्यै स्वाहा ॥
दक्षाय स्वाहा क्रतवे स्वाहा ॥ ओजसे स्वाहा बलाय स्वाहा ॥
देवस्त्वा सविता मद्ध्वाऽनक्तु । 12 (10)

T.A.7.5.2

पृथिवीं तपसस्त्रायस्व । अर्चिरसि शोचिरसि ज्योतिरसि तपोऽसि ।
स॒सीदस्व महा॑ असि । शोचस्व देववीतमः । वि धूममग्ने
अरुषम् मियेद्ध्य । सृज प्रशस्त दर्शतम् । अञ्जन्ति यम्
प्रथयन्तो न विप्राः । वपावन्तन्नाग्निना तपन्तः ।
पितुर्न पुत्र उपसि प्रेष्ठः । आ घर्मो अग्निमृतयन्नसादीत् । 13 (10)

T.A.7.5.3

अ॒ना॒धृ॒ष्या॑ पु॒रस्ता॑त् । अ॒ग्ने॒रा॒धि॒पत्ये॑ । आ॒यु॒र्मे॑ दाः । पु॒त्रव॑ती
दक्षि॒णतः॑ । इ॒न्द्र॒स्या॒धि॒पत्ये॑ । प्र॒जाम् मे॑ दाः । सु॒षदा॑ प॒श्चात् ।
दे॒वस्य॑ स॒वि॒तुरा॒धि॒पत्ये॑ । प्रा॒णम् मे॑ दाः । आ॒श्रु॒तिरु॒त्तर॑तः । 14 (10)

T.A.7.5.4

मि॒त्राव॑रु॒णयो॒राधि॑पत्ये । श्रो॒त्रम् मे॑ दाः । वि॒धृ॒तिरु॒परि॑ष्ठात् ।
बृ॒ह॒स्प॒ते॒राधि॑पत्ये । ब्र॒ह्म मे॑ दाः । क्ष॒त्रम् मे॑ दाः । ते॒जो मे॑ धा॒ वर्चो॑
मे॒ धाः । यशो॑ मे॒ धा स्तपो॑ मे॒ धाः । मनो॑ मे॒ धाः ।
म॒नोर॑श्वा॒ऽसि॒ भूरि॑पु॒त्रा । वि॒श्वा॒भ्यो मा॑ ना॒ष्ट्रा॒भ्यः पा॑हि । 15 (10)

T.A.7.5.5

सू॒प॒सदा॑ मे॒ भूया॑ मा॒ मा हि॒ऽसीः॑ । तपो॑ ष्व॒ग्ने अ॒न्तरा॑ऽमि॒त्रान् ।
तपा॑श॒ऽस॒मरु॑षः॒ पर॑स्य । तपा॑ व॒सो चि॒क्रि॒तानो॑ अ॒चित्तान् ।
वि॒ ते ति॑ष्ठन्ता॒मज॑रा॒ अया॑सः । चि॒तः स्थ॑ परि॒चितः॑ ।
स्वाहा॑ म॒रुद्भिः॑ परि॒श्रय॑स्व । मा॒ असि॑ । प्र॒मा असि॑ ।
प्र॒ति॒मा असि॑ । 16 (10)

T.A.7.5.6

सम्मा असि । विमा असि । उन्मा असि । अन्तरिक्षस्यान्तर्द्धिरसि ।
दिवन्तपसस्त्रायस्व । आभिर् गीर्भिर् यदतो न ऊनम् । आप्यायय
हरिवो वर्द्धमानः । यदा स्तोतृभ्यो महि गोत्रा रुजासि । भूयिष्ठभाजो
अध ते स्याम । शुक्रन्ते अन्यद् यजतन्ते अन्यत् । 17 (10)

T.A.7.5.7

विषुरूपे अहनी द्यौरिवासि । विश्वा हि माया अवसि स्वधावः ।
भद्रा ते पूषन्निह रातिरस्तु । अर्हन् बिभर्षि सायकानि धन्व ।
अर्हन्निष्कं यजतं विश्वरूपम् । अर्हन्निदं दयसे विश्व-मब्भुवम् ।
न वा ओजीयो रुद्र त्वदस्ति । गायत्रमसि । त्रैष्टुभमसि ।
जागतमसि () । मधु मधु मधु । 18 (11)

(अन - क्त्वसादी - दुत्तरतः - पाहि - प्रतिमा असि - यजतन्ते
अन्यज् - जागतमस्येकं च) (A5)

अनुवाकं-6

T.A.7.6.1

द॒श प्रा॒चीर्द॑श॒ भासि॑ दक्षि॒णा । द॒श प्र॒तीची॑र्द॒श भा॒स्युदी॑चीः ।
द॒शोर्ध्वा॑ भासि॒ सुम॑नस्य॒मानः॑ । स नो॒ रुच॑न्धे॒ह्यह॑णीय॒मानः॑ ।
अग्नि॑ष्ट्वा वसु॒भिः पु॒रस्ता॑द्-रोच॒यतु॑ गाय॒त्रेण॑ छन्द॒सा ।
स मा॑ रुचि॒तो रो॑चय । इन्द्र॑स्त्वा रु॒द्रैर्-द॑क्षि॒णतो॑ रोच॒यतु॑ त्रैष्टु॒भेन॑
छन्द॒सा । स मा॑ रुचि॒तो रो॑चय । वरु॑णस्त्वाऽऽदि॒त्यैः प॒श्चाद्-रो॑च॒यतु॑
जाग॑तेन छन्द॒सा । स मा॑ रुचि॒तो रो॑चय । 19 (10)

T.A.7.6.2

द्यु॒तान॑स्त्वा मा॒रुतो॑ मरु॒द्भिरु॑त्तरतो॒ रोच॑य॒त्वानु॑ष्टु॒भेन॑ छन्द॒सा । स मा॑
रुचि॒तो रो॑चय । बृ॒हस्प॑तिस्त्वा वि॒श्वैर् दे॒वैरु॑परि॒ष्टाद्-रो॑च॒यतु॑ पा॒ङ्केन॑
छन्द॒सा । स मा॑ रुचि॒तो रो॑चय । रो॒चित॑स्त्वम् दे॒व घ॑र्म दे॒वेष्व॑सि ।
रोचि॑षीयाहम् म॒नुष्ये॑षु । स॒म्राड् घ॑र्म रुचि॒तस्त्वं
दे॒वेष्वायु॑ष्मा॒स्तेज॑स्वी ब्र॒ह्मव॑र्चस्यसि । रुचि॒तोऽह॑म्
म॒नुष्ये॑ष्वायु॑ष्मा॒स्तेज॑स्वी ब्र॒ह्मव॑र्चसी भूया॒सम् । रु॒गसि॑ ।
रुच॑म् मयि॒ धेहि॑ () । 20 (10)

T.A.7.6.3

मयि॑ रुक् । दश॑ पुरस्ताद्-रोचसे॑ । दश॑ दक्षिणा । दश॑ प्रत्यङ्ङ् ।
दशोदङ्ङ् । दशोद्ध्वो॑ भासि सुमनस्यमानः ।
स नः॑ सम्राडिषमूर्जम् धेहि॑ । वाजी वाजिने॑ पवस्व ।
रोचितो॑ घर्मो॑ रुचीय । 21 (9) (रोचय - धेहि - +नव च) (A6)

अनुवाकं-7

T.A.7.7.1

अपश्य॑ङ्गोपामनिपद्यमानम् । आ च॑ परा च॑ पथिभिश्चरन्तम् ।
स सद्धीचीः॑ स विषूचीर्वसानः॑ । आ वरीवर्ति॑ भुवनेष्वन्तः ।
अत्र॑ प्रावीः । मधु॑ माद्ध्वीभ्याम् मधु॑ माधूचीभ्याम् ।
अनु॑ वाम् देववीतये । समग्नि॑रग्निना॑ गत । सम् देवेन॑ सवित्रा ।
सꣳ सूर्येण॑ रोचते । 22 (10)

T.A.7.7.2

स्वाहा॑ समग्निस्तपसा॑ गत । सम् देवेन॑ सवित्रा । सꣳ सूर्येणारोचिष्ट ।
धर्ता॑ दिवो विभासि॑ रजसः । पृथिव्या॑ धर्ता । उरोरन्तरिक्षस्य॑ धर्ता ।
धर्ता॑ देवो देवानाम् । अमर्त्यस्तपोजाः । हृदे॑ त्वा मनसे॑ त्वा ।

दिवे॑ त्वा॒ सूर्या॑य॒ त्वा । 23 (10)

T.A.7.7.3

ऊ॒र्ध्व॑मि॒म-म॑ध्व॒रङ्क॑धि । दि॒वि दे॒वेषु॑ हो॒त्रा य॑च्छ । वि॒श्वा॑साम् भु॒वाम्
पते॑ । वि॒श्वस्य॑ भु॒वन॑स्पते । वि॒श्वस्य॑ मन॒सस्प॑ते । वि॒श्वस्य॑ व॒चस॑स्पते ।
वि॒श्वस्य॑ तप॒सस्प॑ते । वि॒श्वस्य॑ ब्र॒ह्मण॑स्पते । दे॒वश्रू॑स्त्वन्दे॒व घ॑र्म
दे॒वान् पा॑हि । तपो॒जां वा॑च॒मस्मे॑ निय॒च्छ दे॒वायु॑वम् । 24 (10)

T.A.7.7.4

ग॒र्भो दे॒वानाम्॑ । पि॒ता म॑ती॒नाम् । पतिः॑ प्र॒जानाम्॑ । म॒तिः क॑वी॒नाम् ।
स॒न्दे॒वो दे॒वेन॑ स॒वित्रा॑ऽयतिष्ठ । सꣳ सूर्ये॑णारु॒क्त । आ॒यु॒र्दास्त्व॑मस्मभ्यं
घ॑र्म॒ वर्चो॑दा॒ असि॑ । पि॒ता नो॑ऽसि पि॒ता नो॑ बो॒ध । आ॒यु॒र्द्धास्त्वनू॑धाः
प॒योधाः॑ । व॒र्चो॑दा॒ वरि॑वो॒दा द्र॑वि॒णोदाः॑ । 25 (10)

T.A.7.7.5

अ॒न्तरि॑क्षप्र उ॒रोर्व॑री॒यान् । अ॒शीम॑हि॒ त्वा मा॑ मा॒ हिꣳसीः॑ । त्वम॑ग्ने
गृ॒हप॑तिर्-वि॒शाम॑सि । वि॒श्वा॑साम् मा॒नुषी॑णाम् । श॒तम् पू॒र्भिर्य॑विष्ठ
पा॒ह्यꣳह॑सः । स॒मेद्धा॑रꣳ श॒तꣳ हि॑माः । तं द्रा॒विणꣳ हा॑र्दिवानम् ।
इ॒हैव॑ रा॒तयः॑ सन्तु । त्वष्टी॑मती ते स॒पेय॑ । सुरे॒ता रे॒तो द॑धाना () ।

वी॒रं वि॑दे॒य तव॑ स॒न्दृशि॑ । माऽह॑ꣳ रा॒यस्पो॑षेण॒ वि यो॑षम् । 26 (12)

(रो॒चते॑ – सू॒र्यय॑ त्वा – दे॒वायु॑वं – द्र॒विणो॑दा –
द॒धाना॑ द्वे च) (A7)

अनुवाकं-8

T.A.7.8.1

दे॒वस्य॑ त्वा स॒वितुः॑ प्र॒सवे॑ । अ॒श्विनो॑र् बा॒हुभ्या॑म् । पू॒ष्णो
ह॒स्ताभ्या॑मा द॒दे । अ॒दित्यै॑ रा॒स्नाऽसि॑ । इ॒ड ए॒हि । अ॒दित॑ ए॒हि ।
स॒रस्व॑त्येहि । अ॒सावे॑हि । अ॒सावे॑हि । अ॒सावे॑हि । 27 (10)

T.A.7.8.2

अ॒दित्या॑ उ॒ष्णीष॑मसि । वा॒युर॑स्यै॒डः । पू॒षा त्वो॑पाव॒सृज॑तु ।
अ॒श्विभ्या॑म् प्र दा॒पय॑ । य॒स्ते स्त॑नः श॒शयो॑ यो म॒योभूः॑ ।
येन॑ वि॒श्वा पु॑ष्यसि वा॒र्याणि॑ । यो र॒त्नधा॑ व॒सुवि॑द्यः सु॒दत्रः॑ । स॒रस्व॑ति
तमि॒ह धा॑तवेऽकः । उ॒स्र घ॑र्मꣳ शिꣳष । उ॒स्र घ॑र्मम् पा॒हि । 28 (10)

T.A.7.8.3

घ॒र्माय॑ शिꣳष । बृ॒हस्प॑तिस्त्वो॒पसी॑दतु । दान॑वः स्थ पे॒रवः॑ ।
वि॒ष्वग्वृ॑तो लो॒हिते॑न । अ॒श्विभ्या॑म् पि॒न्वस्व॑ । स॒रस्व॑त्यै पि॒न्वस्व॑ ।

पू॒ष्णे॑ पि॒न्वस्व॑ । बृ॒हस्प॑तये पि॒न्वस्व॑ । इन्द्रा॑य पि॒न्वस्व॑ ।

इन्द्रा॑य पि॒न्वस्व॑ । 29 (10)

T.A.7.8.4

गा॒यत्रो॑ऽसि । त्रै॒ष्टुभो॑ऽसि । जा॒गत॑मसि । स॒होर्जो॑ भा॒गेनो॑प मे॒हि॑ ।

इन्द्रा॑श्चि॒ना म॑धु॒नः सा॒रघ॑स्य । घ॒र्मम् पा॑त व॒सवो॑ य॒जता॑ वट् ।

स्वाहा॑ त्वा सूर्य॑स्य र॒श्मये॑ वृ॒ष्टि॒वन॑ये जुहोमि । म॒धु ह॒विर॑सि ।

सूर्य॑स्य तप॒स्तप॑ । द्या॒वापृ॑थि॒वीभ्यां॑ त्वा परि॑गृह्णामि () । 30 (10)

T.A.7.8.5

अ॒न्तरि॑क्षेण त्वो॒पय॑च्छामि । दे॒वानां॑ त्वा पि॒तृणा॑मनु॒मतो॑ भ॒र्तु॑ऽ

श॒केय॑म् । तेजो॑ऽसि । तेजो॑ऽनु॒प्रेहि॑ । दि॒विस्पृ॑ड्मा मा हि॒ऽसीः॑ ।

अ॒न्तरि॑क्षस्पृड्मा मा हि॒ऽसीः॑ । पृ॒थि॒विस्पृ॑ड्मा मा हि॒ऽसीः॑ ।

सु॒वर॑सि सु॒वर्मे॑ यच्छ । दि॒वं य॑च्छ दि॒वो मा॑ पाहि । 31 (9)

(ए॒हि - पा॒हि - पि॒न्वस्व - गृह्णामि - +न॒व च) (A8)

अनुवाकं-9

T.A.7.9.1

स॒मु॒द्राय॑ त्वा वा॒ताय॑ स्वाहा॑ । स॒लि॒लाय॑ त्वा वा॒ताय॑ स्वाहा॑ ।

अ॒ना॒धृ॒ष्या॒य॒ त्वा॒ वा॒ता॒य॒ स्वा॒हा॑ । अ॒प्र॒ति॒धृ॒ष्या॒य॒ त्वा॒ वा॒ता॒य॒ स्वा॒हा॑ ।
 अ॒व॒स्य॑वे॒ त्वा॒ वा॒ता॒य॒ स्वा॒हा॑ ॥ दु॒व॒स्व॒ते॒ त्वा॒ वा॒ता॒य॒ स्वा॒हा॑ ॥
 शि॒मि॒द्व॒ते॒ त्वा॒ वा॒ता॒य॒ स्वा॒हा॑ ॥ अ॒ग्न॒ये॒ त्वा॒ व॒सु॒म॒ते॒ स्वा॒हा॑ ॥ सो॒मा॒य॒
 त्वा॒ रु॒द्र॒व॒ते॒ स्वा॒हा॑ ॥ व॒रु॒णाय॑ त्वाऽऽदि॒त्य॒व॒ते॒ स्वा॒हा॑ ॥ 32 (10)

T.A.7.9.2

बृ॒ह॒स्प॒त॒ये॒ त्वा॒ वि॒श्व॑दे॒व्या॒व॒ते॒ स्वा॒हा॑ ॥ स॒वि॒त्रे॒ त्व॑र्भु॒म॒ते॒ वि॒भु॒म॒ते॑
 प्र॒भु॒म॒ते॒ वा॒ज॒व॒ते॒ स्वा॒हा॑ ॥ य॒मा॒य॒ त्वाऽङ्गि॑र॒स्व॒ते॒ पि॒तृ॒म॒ते॒ स्वा॒हा॑ ॥
 वि॒श्वा॒ आ॒शा॑ दक्षिण॒सत् । वि॒श्वान्॑ दे॒वान॒या॒डि॒ह । स्वा॒हा॒कृ॒त॒स्य॑
 घ॒र्म॒स्य॑ । म॒धोः॑ पि॒ब॒त॒म॒श्चि॒ना॑ । स्वा॒हा॒ऽग्न॒ये॒ य॒ज्ञि॒या॒य॑ ।
 शं॑ य॒जु॒र्भिः॑ । अ॒श्चि॒ना॑ घ॒र्म॒म् पा॒त॑ हार्दि॒वान॒म् ॥ 33 (10)

T.A.7.9.3

अ॒ह॒र्-दि॒वा॒भि-रू॒ति॒भिः॑ । अ॒नु॒ वा॒न् द्या॒वा॒पृ॒थि॒वी॒ म॑सा॒ता॒म् ।
 स्वा॒हे॒न्द्रा॒य॑ । स्वा॒हे॒न्द्रा॒व॒ट् । घ॒र्म॒म॒पा॒त॒म॒श्चि॒ना॑ हार्दि॒वान॒म् ।
 अ॒ह॒र्-दि॒वा॒भि॒रू॒ति॒भिः॑ । अ॒नु॒ वा॒न् द्या॒वा॒पृ॒थि॒वी॒ अ॒म॑सा॒ता॒म् ।
 त॒म् प्रा॒व्यं॑ यथा॒ व॒ट् । न॒मो॑ दि॒वे॒ । न॒मः॑ पृ॒थि॒व्यै॑ () ॥ 34 (10)

T.A.7.9.4

दिवि॑ धा॑ इ॒मं य॑ज्ञम् । य॒ज्ञमि॑मं दिवि॑ धाः॑ । दि॒वङ्ग॑च्छ ।

अ॒न्तरि॑क्षङ्ग॑च्छ । पृ॒थि॒वीङ्ग॑च्छ । पञ्च॑ प्रदि॒शो ग॑च्छ ।

दे॒वान् घ॑र्म॒पान् ग॑च्छ । पि॒तृन् घ॑र्म॒पान् ग॑च्छ । 35 (8)

(आ॒दि॒त्य॒व॒ते॒ स्वाहा॑-हा॒र्दि॒वान्-पृ॒थि॒व्या-+अ॒ष्टौ च॑) (A9)

अनुवाकं-10

T.A.7.10.1

इ॒षे पी॑पिहि । ऊ॒र्जे पी॑पिहि । ब्र॒ह्म॒णे पी॑पिहि । क्ष॒त्राय॑ पीपिहि ।

अ॒द्भ्यः पी॑पिहि । ओष॑धी॒भ्यः पी॑पिहि । व॒न॒स्प॒ति॒भ्यः पी॑पिहि ।

द्या॒वापृ॑थि॒वीभ्या॑म् पीपिहि । सु॒भू॒ताय॑ पीपिहि ।

ब्र॒ह्म॒व॒र्च॒साय॑ पीपिहि । 36 (10)

T.A.7.10.2

य॒ज॒मा॒नाय॑ पीपिहि । म॒ह्यञ्ज्यै॑ष्ठ्याय॑ पीपिहि । त्वि॒ष्यै॑ त्वा ।

द्यु॒म्नाय॑ त्वा । इ॒न्द्रि॒याय॑ त्वा भू॒त्यै॑ त्वा । ध॒र्मा॑ऽसि सु॒ध॒र्मा॑ मे॒ न्य॒स्मे ।

ब्र॒ह्मा॑णि धारय । क्ष॒त्रा॑णि धारय । वि॒श॒न्धा॑रय ।

ने॒त्वा वा॑तः॒ स्क॒न्द॒यात् । 37 (10)

T.A.7.10.3

अमुष्य॑ त्वा प्राणे॑ सादयामि । अमुना॑ सह निरर्थ॑ङ्गच्छ । योऽस्मान्
द्वेष्टि॑ । यञ्च॑ वयं द्विष्मः॑ । पू॒ष्णे॑ शरसे॑ स्वाहा॑ । ग्राव॑भ्यः स्वाहा॑ ।
प्रतिरे॑भ्यः स्वाहा॑ । द्यावापृथि॑वीभ्या॑ स्वाहा॑ । पितृ॑भ्यो घर्म॑पेभ्यः
स्वाहा॑ । रु॒द्राय॑ रु॒द्रहो॑त्रे स्वाहा॑ । 38 (10)

T.A.7.10.4

अ॒हर् ज्योतिः॑ के॒तुना॑ जुषताम् । सु॒ज्योति॑र् ज्योति॑षा स्वाहा॑ ।
रा॒त्रिर्ज्योतिः॑ के॒तुना॑ जुषताम् । सु॒ज्योति॑र्-ज्योति॑षा स्वाहा॑ ।
अपी॑परो माऽहो॑ रा॒त्रियै॑ मा पाहि । ए॒षा ते॑ अग्ने॑ स॒मित् ।
तया॑ स॒मिद्ध्य॑स्व । आयु॑र्मे दाः । वर्च॑सा माऽञ्जीः ।
अपी॑परो मा॒ रा॒त्रिया॑ अ॒हो मा॑ पाहि । 39 (10)

T.A.7.10.5

ए॒षा ते॑ अग्ने॑ स॒मित् । तया॑ स॒मिद्ध्य॑स्व । आयु॑र्मे दाः । वर्च॑सा
माऽञ्जीः । अ॒ग्निर्-ज्योति॑र्-ज्योति॑रग्निः स्वाहा॑ । सूर्यो॑ ज्योति॑र्-
ज्योतिः॑ सूर्यः॑ स्वाहा॑ । भूः॑ स्वाहा॑ । हु॒त॑ ह॒विः । मधु॑ ह॒विः ।
इन्द्र॑तमेऽग्नौ () । 40 (10)

T.A.7.10.6

पिता नोऽसि मा मा हि॒सीः । अ॒श्याम॑ ते देव॒घर्म॑ । मधु॑मतो
वाज॒वतः॑ पि॒तु॒मतः॑ । अ॒ङ्गिर॑स्वतः स्वधा॒विनः॑ । अ॒शीम॑हि त्वा
मा मा हि॒सीः । स्वाहा॑ त्वा सूर्य॑स्य रश्मि॒भ्यः॑ ।
स्वाहा॑ त्वा नक्ष॑त्रेभ्यः । 41 (7)

(ब्रह्म॑वर्चसाय॑ पीपिहि - स्क॒न्दया॑द् - रु॒दाय॑ रु॒द्रहो॑त्रे स्वाहा -
ऽहो॑ मा पाह - य॒ग्नौ - +सप्त॑ च) (A10)

अनुवाकं-11

T.A.7.11.1

घर्म॑ या ते दि॒वि शुक्॑ । या गा॒यत्रे॑ छन्द॒सि । या ब्रा॑ह्मणे ।
या ह॒विर्द्धाने॑ । तान्त॑ ए॒तेना॑वयजे स्वाहा॑ । घर्म॑ या तेऽन्तरि॑क्षे शुक् ।
या त्रै॒ष्टुभे॑ छन्द॒सि । या रा॑ज॒न्ये । याऽऽग्नी॑द्ध्रे । तान्त॑ ए॒तेना॑वयजे
स्वाहा॑ । 42 (10)

T.A.7.11.2

घर्म॑ या ते पृ॒थिव्या॑ शुक् । या जा॒गते॑ छन्द॒सि । या वैश्ये॑ ।
या स॒दसि॑ । तान्त॑ ए॒तेना॑वयजे स्वाहा॑ । अनु॑नोऽद्यानु॑मतिः{1} ।

अन्विदनुमते त्वम् {2} । दिवस्त्वा परस्पायाः ।

अन्तरिक्षस्य तनुवः पाहि । पृथिव्यास्त्वा धर्मणा । 43 (10)

T.A.7.11.3

वयमनुक्रामाम सुविताय नव्यसे । ब्रह्मणस्त्वा परस्पायाः । क्षत्रस्य
तनुवः पाहि । विशस्त्वा धर्मणा । वयमनुक्रामाम सुविताय नव्यसे ।
प्राणस्य त्वा परस्पायै । चक्षुषस्तनुवः पाहि । श्रोत्रस्य त्वा धर्मणा ।
वयमनुक्रामाम सुविताय नव्यसे । वल्गुरसि शं युधायाः । 44 (10)

T.A.7.11.4

शिशुर्-जनधायाः । शञ्च वक्षि परि च वक्षि ।
चतुः सक्तिर्नाभिर्, ऋतस्य । सदो विश्वायुः शर्म सप्रथाः ।
अप द्वेषो अप ह्वरः । अन्यद्व्रतस्य सश्चिम ।
घर्मेतत् तेऽन्नमेतत् पुरीषम् । तेन वर्द्धस्व चा च प्यायस्व ।
वर्द्धिषीमहि च वयम् । आ च प्यासिषीमहि । 45 (10)

T.A.7.11.5

रन्तिर्-नामासि दिव्यो गन्धर्वः । तस्य ते पद्वद्विर्द्धानम् ।
अग्निरद्ध्यक्षाः । रुद्रोऽधिपतिः । समहमायुषा । सम् प्राणेन ।

सं॑ व॑र्चसा॑ । सम्॑ पयसा॑ । सङ्गौ॑पत्येन॑ । सञ्॑ रायस्पोषेण॑ । 46 (10)

T.A.7.11.6

व्यसौ॑ । योऽस्मान्॑ द्वेष्टि॑ । यञ्च॑ वयं॑ द्विष्मः॑ । अचि॑क्रदद्वृषा॑ हरिः॑ ।
महान्-मि॑त्रो न॑ दर्शतः॑ । सञ्॑ सूर्येण॑ रोचते॑ । चिदसि॑ समुद्रयोनिः॑ ।
इन्द्रु॑र् दक्षः॑ श्येन॑ ऋतावा॑ । हिरण्यपक्षः॑ शकुनो॑ भुरण्युः॑ ।

महान्थ् स॒धस्थे॑ ध्रुव॑ आनिषत्तः॑ । 47 (10)

T.A.7.11.7

नमस्ते॑ अस्तु॑ मा मा॑ हि॒सीः । विश्वाव॑सुञ् सोम॑ गन्धर्वम् । आपो॑
ददृशु॑षीः । तदृ॑तेना॑ व्यायन् । तदन्व॑वैत् । इन्द्रो॑ ररहाण॑ आसाम् ।
परि॑ सूर्यस्य॑ परिधीञ् रपश्यत् । विश्वाव॑सुरभि॑ तन्नो॑ गृणातु । दिव्यो॑
गन्धर्वो॑ रजसो॑ विमानः॑ । यद्वा॑ घा सत्यमु॑त यन्न॑ विद्म । 48 (10)

T.A.7.11.8

धियो॑ हिन्वानो॑ धिय॑ इन्नो॑ अव्यात् । सस्नि॑मविन्दच्चरणे॑ नदीनाम् ।
अपावृ॑णोद्-दुरो॑ अश्म॑व्रजानाम् । प्रासान्॑ गन्धर्वो॑ अमृतानि॑ वोचत् ।
इन्द्रो॑ दक्षम्॑ परिजानादहीनम् । एतत्त्वम्॑ देव॑ घर्म॑ देवो॑ देवानुपागाः ।
इदम॑हम् मनु॑ष्यो मनु॑ष्यान् । सोमपी॑थानु॑ मेहि॑ । सह॑ प्रजया॑ सह॑

रा॒य॒स्पो॒षेण॑ । सु॒मि॒त्रा न॒ आप॒ ओष॑धयः सन्तु () । 49 (10)

T.A.7.11.9

दु॒र्मि॒त्रास्त॑स्मै भू॒यासुः॑ । यो॒ऽस्मान् द्वे॑ष्टि । यञ्च॑ व॒यं द्वि॑ष्मः ।

उद्व॒यन्त॑म॒सस्परि॑ {3} । उदु॒त्यं चि॒त्रम् {4} । इ॒ममू॒ षु त्य॑म॒स्मभ्य॑

स॒निम् । गा॒यत्र॑न्न॒वीया॑स्मम् । अ॒ग्ने दे॒वेषु॑ प्र॒वोचः॑ । 50 (8)

(या॒ऽऽग्नी॑द्द॒ध्रे ता॒न्ता ए॒तेना॑व॒यजे॑ स्वाहा – ध॒र्मणा॑ – शं॒ यु॒धायाः॑ –
प्या॒सिषी॑महि – पो॒षेण॑ – निष॑त्तो – वि॒द्य – सन् – +त्व॑ष्टौ च) (A11)

अनुवाकं-12

T.A.7.12.1

म॒हीना॑म् पयो॒ऽसि॑ वि॒हितं॑ दे॒वत्रा॑ । ज्यो॒तिर्भा॑ अ॒सि

व॒नस्प॑तीना॒मोष॑धीना॒ रसः॑ । वा॒जिन॑म् त्वा वा॒जिनो॑ऽव॒ नयामः॑ ।

ऊ॒र्ध्वम्॑ म॒नः सु॒वर्ग॑म् । 51(4) (A12)

अनुवाकं-13

T.A.7.13.1

अ॒स्कान् द्यौः पृ॒थि॒वीम् । अ॒स्कान् नृ॑ष॒भो यु॒वा गाः॑ । स्क्व॑न्ने॒मा वि॒श्वा

भु॒वना॑ । स्क्व॑न्नो॒ यज्ञः॑ प्र॒जन॑यतु । अ॒स्कान् ज॑नि प्रा॒जनि॑ ।

आ॒ स्क॒न्ना॒ज्जा॒यते॑ वृ॒षा॑ । स्क॒न्नात् प्र॒जनि॑षीमहि । 52 (7) (A13)

अनुवाकं-14

T.A.7.14.1

या॒ पु॒रस्ता॑द् वि॒द्युदा॑पतत् । तान्त॑ ए॒तेना॑व॒ यजे॑ स्वाहा॑ ।
 या॒ दक्षि॑णतः । या॒ पश्चा॑त् । यो॒त्तर॑तः । यो॒परि॑ष्टाद् वि॒द्युदा॑पतत् ।
 तान्त॑ ए॒तेना॑व॒ यजे॑ स्वाहा॑ । 53 (7) (A14)

अनुवाकं-15

T.A.7.15.1

प्रा॒णाय॑ स्वाहा॑ व्या॒नाय॑ स्वाहा॑ ऽपाना॑य स्वाहा॑ । चक्षु॑षे स्वाहा॑
 श्रो॒त्राय॑ स्वाहा॑ । मन॑से स्वाहा॑ वा॒चे सर॑स्वत्यै
 स्वाहा॑ । 54 (3) (A15)

अनुवाकं-16

T.A.7.16.1

पू॒ष्णे स्वाहा॑ पू॒ष्णे शर॑से स्वाहा॑ । पू॒ष्णे प्र॑प॒त्थ्या॑य स्वाहा॑ पू॒ष्णे
 नर॑न्धिषाय स्वाहा॑ । पू॒ष्णे ऽङ्घ्रि॑णये स्वाहा॑ पू॒ष्णे नरु॑णाय स्वाहा॑ ।
 पू॒ष्णे सा॑के॒ताय॑ स्वाहा॑ । 55 (4) (A16)

अनुवाकं-17

T.A.7.17.1

उदस्य॑ शु॒ष्माद् भानु॑र्नार्त॑ बि॒भर्ति॑ । भा॒रम् पृ॒थि॒वी न भूम॑ । प्र शु॒क्रैतु॑
दे॒वी म॑नी॒षा । अ॒स्मत् सु॑त॒ष्टो रथो॑ न वा॒जी । अ॒र्चन्त॑ ए॒के म॒हि
सा॒म म॑न्वत । तेन॑ सू॒र्य॑म॒धार॑यन् । तेन॑ सू॒र्य॑म॒रोच॑यन् ।
घ॒र्मः शि॒रस्त॑द॒यम॒ग्निः॑ । पु॒री॑षम॒सि संप्रि॑यम् प्र॒जया॑ प॒शुभि॑र्भुवत् ।
प्र॒जाप॑तिस्त्वा साद॒यतु॑ ।
तया॑ दे॒वत॑या ऽङ्गि॒रस्वद् ध्रु॒वा सी॑द । 56 (11) (A17)

अनुवाकं-18

T.A.7.18.1

यास्ते॑ अ॒ग्न आ॒र्द्रा यो॑नयो॒ याः कु॑ला॒यिनीः॑ । ये ते॑ अ॒ग्न इ॒न्द्रवो॑ या
उ ना॑भयः । यास्ते॑ अ॒ग्ने त॒नुव॑ ऊ॒र्जो नाम॑ । ताभि॑स्त्वमु॒भयी॑भिः
सम्वि॑दानः । प्र॒जाभि॑र॒ग्ने द्र॑वि॒णेह॑ सी॒द । प्र॒जाप॑तिस्त्वा साद॒यतु॑ ।
तया॑ दे॒वत॑या ऽङ्गि॒रस्वद् ध्रु॒वा सी॑द । 57 (7) (A18)

अनुवाकं-19

T.A.7.19.1

अ॒ग्निर॑सि वैश्वान॒रोऽसि॑ । स॒म्व॒थ्स॒रोऽसि॑ परि॒वथ्स॒रोऽसि॑ ।

इ॒दा॒व॒थ्स॒रोऽसी॒दु॒व॒थ्स॒रोऽसि॑ । इ॒द्व॒थ्स॒रोऽसि॑ व॒थ्स॒रोऽसि॑ । तस्य॑ ते
व॒स॒न्तः शि॒रः । ग्री॒ष्मो दक्षि॑णः प॒क्षः । व॒र्षाः पु॒च्छम् ॥ शर॑दुत्तरः
प॒क्षः । हे॒म॒न्तो म॒द्ध्यम् ॥ पू॒र्व॒प॒क्षाश्चि॑तयः () । अ॒पर॒प॒क्षाः पु॒री॒षम् ।
अ॒हो॒रा॒त्राणी॑ष्टकाः । तस्य॑ ते मा॒साश्चा॒र्द्धमा॒साश्च॑ कल्पन्ताम् ।
ऋ॒त॒व॒स्ते कल्प॑न्ताम् । स॒म् व॒थ्स॒रस्ते॑ कल्पताम् । अ॒हो॒रा॒त्राणि॑ ते
कल्पन्ताम् । ए॒ति प्रे॒ति वी॒ति स॒मित्यु॑दिति । प्र॒जा॒प॒ति॒स्त्वा सा॑दयतु ।
तया॑ दे॒व॒तया॑ऽङ्गि॒रस्वद् ध्रु॒वा सी॑द । 58 (19)

(चि॒तयो॑ न॒व च) (A19)

अनुवाकं-20

T.A.7.20.1

भूर्भु॒वस्सु॑वः । ऊ॒र्ध्व ऊ॒ षुण॑ ऊ॒तये॑ ॥ ऊ॒र्ध्वो नः॑ पा॒ह्य॒हसः॑ ।
वि॒धु॒न्द्र॒द्राण॑ सम॒ने ब॒हूना॑म् । यु॒वा॒न॒ स॒न्तम् प॒लितो॑ जगार ।
दे॒वस्य॑ पश्य॒ का॒व्यम् म॒हित्वा॑ऽद्या म॒मार॑ । स ह्यः॑ स॒मान॑ ।
यदृ॒ते चि॒दभि॑श्रिषः । पु॒रा ज॒र्तृ॒भ्य आ॒तृदः॑ ।
स॒न्धा॒ता स॒न्धिम् म॒घवा॑ पु॒रो॒वसुः॑ । 59 (10)

T.A.7.20.2

निष्कर्ता विहु॑तम् पुनः॑ । पुन॑रूर्जा{5}, सह॑ रय्या {6} । मा नो॑ घर्म
व्यथि॑तो वि॒व्यथो॑ नः । मा नः॑ पर॒मध॑रम्मा रजो॑ऽनैः । मोष्व॑स्मा॒
स्तम॑स्यन्तरा॒ धाः॑ ॥ मा रु॒द्रिया॑सो अ॒भिगु॑र्वृ॒धानः॑ । मा नः॑ क्र॒तुभिर्।
हीडि॑तेभि॒रस्मान् । द्विषा॑ सु॒नीते॑ मा परा॑दाः । मा नो॑ रु॒द्रो नि॒र्ऋति॑र्मा
नो अस्ता॑ ॥ मा द्यावा॑पृथि॒वी हीडि॑षाताम् । 60 (10)

T.A.7.20.3

उप॑ नो मि॒त्रावरु॑णावि॒हाव॑तम् । अ॒न्वादी॑द्द॒ध्याथा॑मि॒ह नः॑ सखा॒या ।
आ॒दि॒त्याना॑म् प्र॒सिति॑र्हे॒तिः । उ॒ग्रा श॒तापा॑ष्ठा घ॒ विषा॑ परि॒णो वृ॑णक्तु ।
इ॒मम् मे॑ वरु॒ण{7}, तत्त्वा॑ या॒मि{8} । त्वन्नो॑ अ॒ग्ने{9},
स त्वन्नो॑ अ॒ग्ने{10} । त्वम॑ग्ने अ॒यासि॑{11} ।
उ॒द्वय॑न्तम॒सस्परि॑ {12} । उ॒दुत्यं॑{13}, चि॒त्रम् {14} ।
वयः॑ सु॒पर्णाः {15} () । 61 (10)

(पुरोवसु॑र्.हीडिषाता॑ सु॒पर्णाः) (A20)

अनुवाकं-21

T.A.7.21.1

भूर्भुवस्सुवः । मयि॑ त्यदिन्द्रि॒यम् मह॑त् । मयि॑ दक्षो॒ मयि॑ क्रतुः॑ ।
 मयि॑ धायि॒ सुवीर्य॑म् । त्रिशु॑ग्धर्मो॒ विभा॑तु मे । आकू॑त्या॒ मनसा॑ सह ।
 विरा॑जा ज्योति॒षा सह॑ । यज्ञे॑न पयसा॒ सह॑ । ब्रह्म॑णा तेजसा॒ सह॑ ।
 क्षत्रे॑ण यशसा॒ सह॑ () । सत्ये॑न तपसा॒ सह॑ । तस्य॑ दोह॒मशीम॑हि ।
 तस्य॑ सु॒म्नम॑शीमहि । तस्य॑ भक्ष॒मशीम॑हि । तस्य॑ त इन्द्रे॑ण पी॒तस्य॑
 मधु॑मतः । उप॑हू॒तस्यो॑पहू॒तो भक्ष॑यामि । 62 (16)

(यशसा॑ सह षट्च) (A21)

अनुवाकं-22

T.A.7.22.1

यास्ते॑ अग्ने॒ घोरा॑स्तनुवः । क्षुच्च॑ तृष्णा च । अस्नु॑क्चानाहु॒तिश्च॑ ।
 अश॑नया च पिपासा च । सेदि॑श्चामतिश्च । ए॒तास्ते॑ अग्ने॒ घोरा॑स्तनुवः ।
 ताभि॑रमु॒ङ्गच्छ॑ । योऽस्मा॑न् द्वेष्टि॑ ।
 यञ्च॑ वयं॒ द्विष्मः॑ । 63 (9) (A22)

अनुवाकं-23

T.A.7.23.1

स्निक्च स्नीहि॑तिश्च स्निहि॑तिश्च । उ॒ष्णा च॑ शी॒ता च॑ । उ॒ग्रा च॑ भी॒मा
च॑ । स॒दाम्नी॑ से॒दिरनि॑रा । ए॒तास्ते॑ अ॒ग्ने घो॒रास्त॒नुवः॑ । ताभि॑रमु॒ङ्गच्छ॑ ।
योऽस्मा॑न् द्वेष्टि॑ । यञ्च॑ व॒यं द्वि॒ष्मः । 64 (8) (A23)

अनुवाकं-24

T.A.7.24.1

धु॒निश्च॑ ध्वा॒न्तश्च॑ ध्व॒नश्च॑ ध्व॒नय॑ञ्च । नि॒लिम्प॑श्च वि॒लिम्प॑श्च
वि॒क्षिपः॑ । 65 (2) (A24)

अनुवाकं-25

T.A.7.25.1

उ॒ग्रश्च॑ धु॒निश्च॑ ध्वा॒न्तश्च॑ ध्व॒नश्च॑ ध्व॒नय॑ञ्च ।
स॒हस॒हाञ्च॑ स॒हमा॑नश्च स॒हस्वा॑ञ्च स॒हीया॑ञ्च ।
ए॒त्य प्रे॑त्य वि॒क्षिपः॑ । 66 (3) (A25)

अनुवाकं-26

T.A.7.26.1

अ॒होरा॑त्रे त्वोदी॑रयताम् । अ॒र्द्धमा॑सास्त्वोदीं॑ जयन्तु ।
मा॒सास्त्वा॑ श्रपयन्तु । ऋ॒तव॑स्त्वा पचन्तु ।

सम्॑व॒थ्स॒रस्त्वा॑ ह॒न्त्वसौ॑ । 67 (5) (A26)

अनुवाकं-27

T.A.7.27.1

खट्॑ फड्॑ ज॒हि । छि॒न्धी॑ भि॒न्धी॑ ह॒न्धी॑ कट्॑ ।

इति॑ वाचः॑ कू॒राणि॑ । 68 (3) (A27)

अनुवाकं-28

T.A.7.28.1

विगा॑ इन्द्र॑ वि॒चर॑न्थ् स्पा॒शय॑स्व । स्व॒पन्त॑मिन्द्र॑ पशु॒मन्त॑मिच्छ ।

वज्रे॑णामुम् बो॒धय॑ दुर्वि॒दत्र॑म् । स्व॒पतो॑ऽस्य॒ प्रहर॑ भो॒जने॑भ्यः ।

अग्ने॑ अ॒ग्निना॑ सम्॑व॒दस्व॑ । मृ॒त्यो मृ॒त्युना॑ सम्॑व॒दस्व॑ । नम॑स्ते

अस्तु॑ भगवः॑ । सकृ॑त्ते अग्ने॑ नमः॑ । द्वि॒स्ते नमः॑ । त्रि॒स्ते नमः॑ () ।

चतु॑स्ते नमः॑ । पञ्च॑कृत्वस्ते॑ नमः॑ । दश॑कृत्वस्ते॑ नमः॑ ।

शत॑कृत्वस्ते॑ नमः॑ । आस॑हस्रकृत्वस्ते॑ नमः॑ । अप॑रिमि॒तकृ॑त्वस्ते॑

नमः॑ । नम॑स्ते अस्तु॑ मा मा हि॒प्सीः॑ । 69 (17)

(त्रि॒स्ते नमः॑ स॒प्त च॑) (A28)

अनुवाकं-29

T.A.7.29.1

अ॒सृ॒न् मु॒खो रु॒धिरे॒णाव्य॑क्तः । य॒मस्य॑ दू॒तः श्र॒पाद्-वि॒धाव॑सि ।
गृ॒ध्रः सु॒पर्णः कु॒णप॒न्निषे॑वसे । य॒मस्य॑ दू॒तः प्र॒हितो भ॒वस्य॑
चो॒भयोः॑ ॥ 70 (4) (A29)

अनुवाकं-30

T.A.7.30.1

यदे॒तद्-वृ॒कसो॑ भू॒त्वा । वाग् दे॒व्यभि॑रायसि । द्वि॒षन्त॑म् मेऽभि॑राय ।
तम् मृ॒त्यो मृ॒त्यवे॑ नय । स आ॒र्त्याऽऽर्ति॑माच्छ॒तु ॥ 71 (5) (A30)

अनुवाकं-31

T.A.7.31.1

यदी॑षितो यदि वा स्व॒कामी॑ । भये॑डको वदति वाच॒मेता॑म् ।
तामिन्द्रा॑ग्नी ब्रह्म॒णा सम्॑वि॒दानौ॑ ।
शि॒वाम॒स्मभ्यं॑ कृणुतङ्ग॒हेषु॑ ॥ 72 (4) (A31)

अनुवाकं-32

T.A.7.32.1

दी॒र्घमु॑खि दुर्॒हणु॑ । मा स्म दक्षि॑णतो वदः । यदि दक्षि॑णतो वदाद्
द्वि॒षन्त॑म् मेऽव॒ बाधा॑सै ॥ 73 (3) (A32)

अनुवाकं-33

T.A.7.33.1

इ॒त्थादु॑लू॒क आ॑प॒प्तत् । हि॒र॒ण्य॑क्षो अ॒यो॒मु॒खः । र॒क्ष॑सा॒न्दू॒त आ॑गतः ।
त॒मि॒तो ना॑शयाग्ने । 74 (4) (A33)

अनुवाकं-34

T.A.7.34.1

यदे॒तद् भू॒तान्य॑न्वाविश्य । दे॒वीं वा॑चं व॒दसि॑ । द्वि॒षतो॑ नः प॒राव॑द ।
तान् मृ॒त्यो मृ॒त्यवे॑ नय । त आ॒र्त्याऽऽ॒र्ति॒माच्छ॑न्तु ।
अ॒ग्नि॒नाऽग्निः॑ सम्॒वद॑ताम् । 75 (6) (A34)

अनुवाकं-35

T.A.7.35.1

प्र॒सार्य॑ स॒क्थ्यौ॑ प॒तसि॑ । स॒व्यम॑क्षि नि॒पेपि॑ च ।
मे॒ह क॑स्य॒चना॑ममत् । 76 (3) (A35)

अनुवाकं-36

T.A.7.36.1

अ॒त्रि॒णा त्वा॑ क्रि॒मे ह॑न्मि । क॒ण्वे॑न ज॒मद॑ग्निना । वि॒श्वाव॑सोर् ब्र॒ह्म॒णा
ह॒तः । क्रि॒मी॒णाञ् राजा॑ ॥ अ॒प्येषा॑ स्थ॒पति॑र्ह॒तः । अथो॑ मा॒ताऽथो॑
पि॒ता । अथो॑ स्थू॒रा अथो॑ क्षु॒द्राः । अथो॑ कृ॒ष्णा अथो॑ श्वे॒ताः ।

अथो आशातिका हताः । श्वेताभिः सह

सर्वे हताः । 77 (10) (A36)

अनुवाकं-37

T.A.7.37.1

आहरावद्य । शृतस्य हविषो यथा ॥ तत् सत्यम् । यदमुं यमस्य
जम्भयोः । आदधामि तथा हि तत् । खण्णम्मसि । 78 (6) (A37)

अनुवाकं-38

T.A.7.38.1

ब्रह्मणा त्वा शपामि । ब्रह्मणस्त्वा शपथेन शपामि । घोरेण त्वा
भृगूणाञ्चक्षुषा प्रेक्षे ॥ रौद्रेण त्वाङ्गिरसाम् मनसा ध्यायामि ।
अघस्य त्वा धारया विद्ध्यामि ।

अधरो मत् पद्यस्वासौ । 79 (6) (A38)

अनुवाकं-39

T.A.7.39.1

उत्तुद शिमिजावरि । तल्पेजे तल्प उत्तुद । गिरीं रनु प्रवेशय ।
मरीचीरुप सन्नुद । यावदितः पुरस्तादुदयाति सूर्यः ।
तावदितोऽमुन्नाशय । योऽस्मान् द्वेष्टि ।

यञ्च॑ व॒यम् द्वि॒ष्मः । 80 (8) (A39)

अनुवाकं-40

T.A.7.40.1

भूर्भु॑वस्सु॒वो भूर्भु॑वस्सु॒वो भूर्भु॑वस्सु॒वः । भुवो॑ऽद्वायि॒ भुवो॑ऽद्वायि॒
भुवो॑ऽद्वायि॒ । नृ॒म्णायि॑ नृ॒म्णाम् नृ॒म्णायि॑ नृ॒म्णाम् नृ॒म्णायि॑ नृ॒म्णाम् ।
निधा॑ य्योऽवायि॒ निधा॑ य्योऽवायि॒ निधा॑ य्योऽवायि॒ । ए॒ अस्मे॑ अस्मे॒ ।
सुव॑र्न॒ ज्योतीः॑ ॥ 81 (6) (A40)

अनुवाकं-41

T.A.7.41.1

पृथि॑वी॒ समि॑त् । ताम॑ग्निः॒ समि॑न्धे । साऽग्नि॑ऽ समि॑न्धे । ताम॑ह॒ऽ
समि॑न्धे । सा॒ मा॒ समि॑द्धा । आयु॑षा॒ तेज॑सा । वर्च॑सा॒ श्रिया॑ ।
यश॑सा॒ ब्रह्म॑वर्च॒सेन॑ । अ॒न्नाद्ये॑न॒ समि॑न्ता॒ऽ स्वाहा॑ ॥

अ॒न्तरि॑क्ष॒ऽ समि॑त् । 82 (10)

T.A.7.41.2

तां वा॑युः॒ समि॑न्धे । सा॒ वायु॑ऽ समि॑न्धे । ताम॑ह॒ऽ समि॑न्धे ।
सा॒ मा॒ समि॑द्धा । आयु॑षा॒ तेज॑सा । वर्च॑सा॒ श्रिया॑ ।
यश॑सा॒ ब्रह्म॑वर्च॒सेन॑ । अ॒न्नाद्ये॑न॒ समि॑न्ता॒ऽ स्वाहा॑ ॥ द्यौः॒ समि॑त् ।

ता॒मा॒दि॒त्यः॑ समि॒न्धे । 83 (10)

T.A.7.41.3

सा॒ऽऽदि॒त्यꣳ॑ समि॒न्धे । ता॒महꣳ॑ समि॒न्धे । सा॒ मा॒ समि॒द्धा ।
 आ॒यु॒षा॑ ते॒जसा॑ । वर्च॑सा श्रि॒या । यश॑सा ब्र॒ह्मव॑र्चसे॒न ।
 अ॒न्नाद्ये॑न॒ समि॑न्ताꣳ स्वाहा॑ ॥ प्रा॒जाप॑त्या मे॒ समि॑दसि स॒पत्न॑क्षय॒णी ।
 भ्रातृ॑व्यहा मे॒ऽसि॒ स्वाहा॑ ॥ अ॒ग्ने॑ व्रत॒पते॑ व्रतञ्च॒रिष्या॑मि । 84 (10)

T.A.7.41.4

तच्छ॑के॒यं त॒न्मे रा॑द्ध्यताम् । वा॒यो व्रत॑पत आ॒दि॒त्य व्रत॑पते । व्र॒तानां॑
 व्र॑तपते व्रतञ्च॒रिष्या॑मि । तच्छ॑के॒यं त॒न्मे रा॑द्ध्यताम् । द्यौः॑ स॒मित् ।
 ता॒मा॒दि॒त्यः॑ समि॒न्धे । सा॒ऽऽदि॒त्यꣳ॑ समि॒न्धे । ता॒महꣳ॑ समि॒न्धे ।
 सा॒ मा॒ समि॒द्धा । आ॒यु॒षा॑ ते॒जसा॑ । 85 (10)

T.A.7.41.5

वर्च॑सा श्रि॒या । यश॑सा ब्र॒ह्मव॑र्चसे॒न । अ॒न्नाद्ये॑न॒ समि॑न्ताꣳ स्वाहा॑ ॥
 अ॒न्तरि॑क्षꣳ स॒मित् । तां वा॒युः॑ समि॒न्धे । सा॒ वा॒युꣳ॑ समि॒न्धे ।
 ता॒महꣳ॑ समि॒न्धे । सा॒ मा॒ समि॒द्धा । आ॒यु॒षा॑ ते॒जसा॑ ।
 वर्च॑सा श्रि॒या । 86 (10)

T.A.7.41.6

य॑श॒सा ब्र॑ह्मव॒र्चसे॑न । अ॒न्नाद्ये॑न॒ समि॑न्ता॒ स्वाहा॑ ॥ पृ॒थि॒वी स॒मि॒त् ।
ताम॑ग्निः॒ समि॑न्धे । साऽग्नि॑ स॒मि॑न्धे । ताम॑ह॒ समि॑न्धे ।
सा मा॑ स॒मि॒द्धा । आ॒यु॒षा ते॑ज॒सा । व॒र्चसा॑ श्रि॒या ।
य॑श॒सा ब्र॑ह्मव॒र्चसे॑न () । 87 (10)

T.A.7.41.7

अ॒न्नाद्ये॑न॒ समि॑न्ता॒ स्वाहा॑ ॥ प्रा॒जाप॑त्या मे॒ समि॑द॒सि स॒पत्न॑क्षय॒णी ।
भ्रा॒तृव्य॑हा मे॒ऽसि॑ स्वाहा॑ ॥ आ॒दि॒त्य व्र॑त॒पते॑ व्र॒तम॑चा॒रिष॑म् । तद॑श॒कं
तन्मे॑ऽराधि॑ । वा॒यो व्र॑त॒पते॑ऽनै॒ व्र॑त॒पते॑ । व्र॒तानां॑ व्र॒तप॑ते॒ व्र॒तम॑चा॒रिष॑म् ।
तद॑श॒कं तन्मे॑ऽराधि॑ । 88 (8)

(स॒मि॒त् - स॒मि॑न्धे - व्र॒तञ्च॑रि॒ष्या - म्या॑यु॒षा ते॑ज॒सा - व॒र्चसा॑
श्रि॒या - य॑श॒सा ब्र॑ह्मव॒र्चसे॑ना - +ष्टौ च) (A41)

अनुवाकं-42

T.A.7.42.1

श॒न्नो वा॑तः पव॒ताम् मा॒तरि॑श्वा श॒न्नस्त॑पतु॒ सूर्यः॑ । अ॒हानि॑ श॒म्
भव॑न्तु नः श॒ र॒त्रिः प्र॑ति॒धीय॑ताम् । श॒मु॒षा नो॑ व्यु॒च्छतु॑

श॒मादि॒त्य उ॒देतु॑ नः । शि॒वा नः॑ श॒न्त॒मा भ॒व सु॒मृ॒डीका॑ सर॒स्वति॑ ।
 मा ते॒ व्यो॒म स॒न्दृशि॑ । इ॒डा॒यै वा॒स्त्व॒सि वा॒स्तु॒मद् वा॒स्तु॒मन्तो॑
 भू॒यास्म॒ मा वा॒स्तो-॑रि॒च्छ॒थ्स्म॒ह्य वा॒स्तुः स भू॒याद्-यो॑ऽस्मान् द्वेष्टि
 यञ्च॑ व॒यं द्वि॒ष्मः । प्र॒तिष्ठा॑ऽसि प्र॒तिष्ठा॑वन्तो भू॒यास्म॒ मा प्र॒तिष्ठा॑या-
 रि॒च्छ॒थ्स्म॒ह्य प्र॒तिष्ठः॑ स भू॒याद् यो॑ऽस्मान् द्वेष्टि यञ्च॑ व॒यं द्वि॒ष्मः ।
 आ वा॒त वा॒हि भेष॑जम् वि वा॒त वा॒हि यद्र॑पः ।
 त्वञ् हि वि॒श्वभेष॑जो दे॒वानां॑ दू॒त ई॒यसे॑ । द्वा॒वि॒मौ वा॒तौ वा॒त
 आ सि॒न्धो॒रा प॒राव॑तः । 89 (10)

T.A.7.42.2

दक्ष॑म् मे अ॒न्य आ॒वातु॑ प॒राऽन्यो॑ वा॒तु यद्-र॑पः । यद॑दो वा॒त ते
 गृ॒हेऽमृत॑स्य नि॒धिर्-हि॒तः । ततो॑ नो दे॒हि जी॒वसे॑ ततो॑ नो धे॒हि
 भेष॑जम् । ततो॑ नो मह॒ आव॑ह वा॒त आ॒वातु॑ भेष॑जम् ।
 श॒म्भूर् म॒योभू॑र्नो ह॒दे प्र ण॑ आ॒यू॒षि ता॑रिषत् । इन्द्र॑स्य गृ॒होऽसि॑
 तम् त्वा प्र॑पद्ये स॒गु॒स्साश्चः॑ । सह॒ यन्मे॑ अ॒स्ति ते॑न । भूः प्र॑पद्ये
 भुवः॑ प्र॑पद्ये सु॒वः प्र॑पद्ये भूर्भु॒वस्सु॒वः प्र॑पद्ये वा॒युम् प्र॑पद्येऽना॒र्ताम्॑

दे॒वता॑म् प्र॒पद्ये॑ ऽऽ॒मान॑माखणम् प्र॒पद्ये॑ प्र॒जाप॑तेर् ब्रह्म॒कोश॑म् ब्रह्म
 प्र॒पद्ये॑ ओम् प्र॒पद्ये॑ । अ॒न्तरि॑क्षम् म उ॒र्वन्तर॑म् बृ॒हद॑ग्नयः पर्व॒ताश्च
 यया॑ वातः स्व॒स्त्या स्व॑स्ति॒मान्त॑या स्व॒स्त्या स्व॑स्ति॒ मान॑सानि ।
 प्रा॒णापा॑नौ मृ॒त्योर्मा॑ पा॒तम् प्रा॑णा॒पानौ॑ मा मा हा॒सिष्ट॑म् मयि॑ मे॒धाम्
 मयि॑ प्र॒जाम् म॒य्यग्नि॑ स्तेजो॑ दधातु मयि॑ मे॒धाम् मयि॑ प्र॒जाम्
 मयीन्द्र॑ इन्द्रि॒यम् दधातु॑ मयि॑ मे॒धाम् मयि॑ प्र॒जाम् मयि॑ सू॒र्यो
 भ्राजो॑ दधातु । 90 (10)

T.A.7.42.3

द्यु॒भिर॑क्तुभिः परि॒पात॑-मस्मान॒रिष्टे॑भि-रश्चि॒ना सौ॑भगेभिः । तन्नो॑ मि॒त्रो
 वरु॑णो मामह॒न्ता म॑दि॒तिः सि॒न्धुः पृ॑थि॒वी उ॒त द्यौः॑ । कया॑ नश्चि॒त्र
 आ॒भुव॑दू॒ती स॒दावृ॑धः सखा॑ । कया॑ श॒चिष्ट॑या वृ॒ता । कस्त्वा॑ स॒त्यो
 म॑दानाम् म॒हिष्ठो॑ मथ्सद॒न्धसः॑ । दृ॒ढा चि॑दा॒रुजे॑ वसु॑ । अभी॑ षु णः
 सखी॑नामवि॒ता ज॑रि॒तृणा॑म् । श॒तम् भ॑वा॒स्यूति॑भिः । वयः॑ सु॒पर्णा
 उ॒पसे॑दु॒रिन्द्र॑म् प्रि॒यमे॑धा ऋ॒षयो॑ ना॒धमा॑नाः । अप॑ ध्वान्त॒मूर्णु॑हि पू॒र्धि
 चक्षु॑र् मु॒मुग्ध्य॑स्मा-न्नि॒धये॑व ब॒द्धान् । 91 (10)

T.A.7.42.4

शन्नो॑ दे॒वीर॑भिष्ट॒य आपो॑ भवन्तु पी॒तये॑ । शं॑ यो॒रभि॑स्रवन्तु नः ।
 ईशा॑ना वा॒र्याणा॑म् क्षय॑न्तीश्च॒र्षणी॑नाम् । अपो॑ या॒चामि॑ भेष॒जम् ।
 सु॒मित्रा॑ न आप॒ ओष॑धयः सन्तु दु॒र्मित्रा॑स्तस्मै॑ भूया॒सुर्-योऽस्मान्-
 द्वेष्टि॑ यञ्च॒ वयं॑ द्विष्मः । आपो॑ हि ष्ठा म॒योभु॑वस्ता न ऊ॒र्जे द॑धातन ।
 महे॑ रणा॒य च॑क्षसे । यो वः शि॒वत॑मो र॒सस्त॑स्य भाज॒यते॑ह नः ।
 उ॒शती॑रिव॒ मातरः॑ । तस्मा॑ अ॒रम् ग॑माम॒ वो यस्य॑
 क्षया॑य जिन्वथ । 92 (10)

T.A.7.42.5

आपो॑ जन॒यथा॑ च नः । पृथि॑वी शान्ता साऽग्नि॑ना शान्ता सा मे
 शान्ता॑ शुच॑श्च॒ शम॑यतु । अ॒न्तरि॑क्षश्च॒ शान्तं॑ तद् वा॒युना॑ शान्तं
 तन्मे॑ शान्त॑श्च॒ शुच॑श्च॒ शम॑यतु । द्यौः शान्ता॑ साऽऽदि॒त्येन॑ शान्ता
 सा मे॑ शान्ता शुच॑श्च॒ शम॑यतु । पृथि॑वी शान्ति॒रन्तरि॑क्षश्च॒
 शान्ति॑र् द्यौः शान्ति॑र् दि॒शः शान्ति॑ रवान्तरदि॒शाः शान्ति॑ रग्निः
 शान्ति॑र् वा॒युः शान्ति॑ रदि॒त्यः शान्ति॑ श्चन्द्र॒माः शान्ति॑र् नक्ष॒त्राणि॑

शान्ति॑ रा॒पः॑ शान्ति॑ रोष॑ध॒यः॑ शान्ति॑र् व॒नस्प॑त॒यः॑ शान्ति॑र् गौः॑ शान्ति॑
रजा॑ शान्ति॑ रश्चः॑ शान्तिः॑ पु॒रुषः॑ शान्ति॑र् ब्र॒ह्म शान्ति॑र् ब्रा॒ह्मणः॑
शान्तिः॑ शान्ति॑रे॒व शान्तिः॑ शान्ति॑र्मे अस्तु॑ शान्तिः॑ । तया॑ऽह॒ः शान्त्या॑
सर्व॑शान्त्या॒ मह्यं॑ द्वि॒पदे॑ चतु॒ष्पदे॑ च शान्ति॑म् करोमि॒ शान्ति॑र्मे अस्तु॑
शान्तिः॑ । ए॒ह श्रीश्च॑ ह्रीश्च॑ धृ॒तिश्च॑ तपो॑ मे॒धा प्रति॑ष्ठा श्रद्धा॒ सत्यं॑
धर्म॑श्चै॒तानि॑ मो॒त्तिष्ठ॑न्त-म॒नूत्तिष्ठ॑न्तु मा॒ मा॑ श्रीश्च॑ ह्रीश्च॑ धृ॒तिश्च॑ तपो॑
मे॒धा प्रति॑ष्ठा श्रद्धा॒ सत्यं॑ धर्म॑श्चै॒तानि॑ मा॒ मा॑ हा॒सिषुः॑ ।
उदा॑युषा॒ स्वायु॑षोदोष॒धीना॑ऽ रसे॒नोत् प॑र्जन्यस्य शु॒ष्मे णो॑दस्था-
म॒मृता॑ऽ अनु॑ । तच्चक्षु॑र् दे॒वहि॑तम् पु॒रस्ता॑ च्छु॒क्रमु॑च्चरत् । पश्ये॑म
शर॑दः शतम् जी॒वेम॑ शर॑दः शतम् न॒न्दाम॑ शर॑दः शतम् मो॒दाम॑
शर॑दः शतम् भ॒वाम॑ शर॑दः शत॑ऽ शृ॒ण्वाम॑ शर॑दः शतम् प्र॒ब्रवाम॑
शर॑दः शत॑ म॒जीताः॑ स्याम॒ शर॑दः शतम् ज्यो॒क्च
सूर्य॑म् दृ॒शे () । 93 (10)

T.A.7.42.6

य उद॑गान् मह॒तोऽर्ण॑वाद्-वि॒भ्राज॑मानः स॒रिर॑स्य म॒ध्याथ्स॑ मा वृ॒षभो॑

लोहि॑ताक्षः॑ सू॒र्यो॑ वि॒पश्चि॑न् मन॒सा पु॑नातु । ब्र॒ह्मणः॑ श्रो॒तन्य॑सि ब्र॒ह्मण॑
आ॒णी स्थो॑ ब्र॒ह्मण॑ आ॒वप॑नमसि धा॒रिते॑यम् पृथि॒वी ब्र॒ह्मणा॑ म॒ही
धा॒रित॑मे॒नेन॑ म॒हद॑न्तरि॒क्षम् दि॒वम् दा॑धार पृथि॒वीꣳ स॑दे॒वां य॑दहं वे॒द
तद॑हं धा॒रया॑णि मा म॒द्वेदोऽधि॑ वि॒स्रस॑त् । मे॒धाम॑नीषे माऽऽवि॒शताꣳ
स॒मीची॑ भू॒तस्य॑ भ॒व्यस्या॑व॒रुध्यै॑ स॒र्वमा॑युरयाणि स॒र्वमा॑युरयाणि ।
आ॒भिर् गी॒र्भिर् य॑दतो न ऊ॒नमा॑प्यायय हरि॒वो वर्ध॑मानः ।
यदा॑ स्तो॒तृभ्यो॑ म॒हि गो॒त्रा रु॒जासि॑ भूयिष्ठभा॒जो अध॑ ते स्याम ।
ब्र॒ह्म प्रा॒वादि॑ष्म तन्नो मा हा॒सीत् ।
ओम् शान्तिः॑ शान्तिः॑ शान्तिः॑ । 94 (7)

(परा॑वतो॑-दधा॑तु-ब्र॒ह्मन्-जि॒न्वथ॑-दृ॒शे-+सप्त॑ च) (A42)

Prapaataka Korvai with starting Padams of 1 to 42 Anuvaakams :-

(न॒मो - यु॒ञ्जते॑ - वृ॒ष्णो अ॑श्वस्य - ब्र॒ह्मन् प्र॑वर्ग्येण - ब्र॒ह्मन्
प्र॑चरिष्या॒मो - द॒श प्रा॑ची - र॒पश्य॑ङ्गोपा॒मम् - दे॒वस्य॑ -
स॒मुद्रा॑ - ये॒षे पी॑पिहि - घ॒र्म या॑ ते - म॒हीना॑म् च॒त्वा - र्य॑स्कान्.
- या॑ पु॒रस्ता॑त् सप्त सप्त - प्रा॒णाय॑ त्रीणि - पू॒ष्णे च॑त्वायुर् -

दस्यैकादश - यास्ते सप्ता - ग्निर् दध्रुवसीः दैकान्न विंशतिर् -
भूरूर्ध्व त्रिंशतद् - भूर् मयि षोडश - यास्ते घोरा नव -
स्निक्चाष्टौ - धुनिश्च द्वे - उग्रश्च त्रीणी - होरात्रे पञ्च - खट्
त्रीणि - विगाः सप्तदशा - सृन् मुखः चत्वारि - यदेतद् वृकसः
पञ्च - यदीषित श्चत्वारि - दीर्घमुखि त्रीणि - तथा च्चत्वारि -
यदेतद् भूतानि षट् - प्रसार्य त्रीण्य - त्रीणा दशा- हरावद्य -
ब्रह्मणा षट्त् षड् - उत्तुदाष्टौ - भूः षट् - पृथिव्यष्ट षष्टिः -
शन्नः सप्तपञ्चाशद् द्विचत्वारिंशत्)

Korvai with starting Padams of 1, 11, 21 Series of Dasinis :-

(नमो वाचे - ब्रह्मन् प्रवर्ग्येण - मयि रु - गन्तरिक्षेण - पिता
नोऽसि - महीना - मुप नो - यदेतद् - भूर् - द्यूभि श्चतुर्
नवतिः)

। हरिः ओम् ।

कृष्ण यजुर्वेदीय तैत्तिरीय ब्राह्मणे आरण्यके

सप्तमः प्रपाठकः समाप्तः

Appendix (of expansions)

T.A.7.11.2 – अनु॑नोऽद्या॑नुमतिः{1} , अन्वि॑दनुमते॒ त्वम् {2}

अनु॑ नोऽद्या॑नुमतिर्य॒ज्ञं दे॒वेषु॑ मन्यतां ।

अग्नि॑श्च ह॒व्यवा॑हनो भवतां दा॒शुषे॑ मयः ॥ {1}

अन्वि॑दनुमते॒ त्वं म॒न्यासै॑ शञ्चनः कृधि ।

क्र॒त्वे द॒क्षाय॑ नो हि॒नु प्र॒ण आयू॑षि तारिषः ॥ {2}

(Both {1} and {2} appearing in TS 3.3.11.3 and 3.3.11.4)

T.A.7.11.9 – उ॒द्वय॑न्तम॒सस्परि॑ {3} , उ॒दुत्यं॑ चि॒त्रम् {4}

उ॒द्वयं॑ तम॒सस्परि॑ पश्यन्तो ज्योतिरुत्तरं ।

दे॒वं दे॒वत्रा॑ सूर्यमगन्म ज्योतिरुत्तमं ॥ {3}

{3} appearing in T.S.4.1.7.4)

उ॒दु त्यं॑ जा॒तवे॑दसं दे॒वं व॑हन्ति के॒तवः॑ । दृ॒शे वि॒श्वाय॑ सूर्यं ॥

चि॒त्रं दे॒वाना॑-मु॒दगा॑दनीकं चक्षु॑ मि॒त्रस्य॑ वरुणस्याऽग्नेः ॥ {4}

{4} appearing in T.S.1.4.43.1)

T.A.7.20.2 – पुनरूर्जा{5}, सह रय्या {6}

पुनरूर्जा॑ नि॒ वर्त॑स्व पुन॒रग्न॑ इ॒षाऽऽयु॑षा । पुन॒र्नः॑ पाहि॒ विश्व॑तः ॥ {5}

सह॑ रय्या॒ नि॒ वर्त॑स्वाग्ने॒ पिन्व॑स्व धारया॑ ।

विश्व॑फ॒स्निया॑ विश्व॒तस्परि॑ ॥ {6}

(Both {5} and {6} appearing in T.S.1.5.3.3)

T.A.7.20.3 – इमम् मे वरुण{7}, तत्त्वा यामि{8}

इमं॑ मे वरुण॑ श्रु॒धी हव॑मद्या च मृ॒डय॑ ।

त्वाम॑वस्युरा च॒के ॥ {7}

तत्त्वा॑ यामि॒ ब्रह्म॑णा वन्द॒मान-स्तदा॑ शा॒स्ते यज॑मानो ह॒विर्भिः॑ ।

अहे॑डमानो वरुणे॒ह बो॒ध्युरु॑श॒स मा न॑ आयुः प्रमो॒षीः ॥ {8}

(Both {7} and {8} appearing in T.S.2.1.11.6)

T.A.7.20.3 – त्वन्नो अग्ने{9}, स त्वन्नो अग्ने{10}

त्वं नो॑ अग्ने॒ वरुण॑स्य वि॒द्वान् देव॑स्य हे॒डोऽव॑ यासि सी॒ष्ठाः ।

यजिष्ठो वह्नि तमः शोशुचानो विश्वा द्वेषांसि प्रमुमुग्ध्यस्मत् ॥ {9}

स त्वंनो अग्नेऽवमो भवोती नेदिष्ठो अस्या उषसो व्युष्टौ ।

अव यक्ष्व नो वरुणं रराणो वीहि मृडीकं सुहवो न एधि ॥ {10}

(Both {9} and {10} appearing in T.S.2.5.12.3)

T.A.7.20.3 – त्वमग्ने अयासि{11}

त्वमग्ने अयासि । अया सन्मनसा हितः । अया सन् हव्यमूहिषे ।

अया नो धेहि भेषजम् । इष्टो अग्निराहुतः । स्वाहाकृतः पिपर्तु नः ।

स्वगा देवेभ्य इदं नमः ॥ {11}

({11} appearing in T.B.2.4.1.9)

T.A.7.20.3 – उद्वयन्तमसस्परि {12} , उदुत्यं {13}, चित्रम् {14}

{12}, {13} and {14} is same as {3} and {4} above

T.A.7.20.3 – वयः सुपर्णाः {15}

वयः सुपर्णा उपसेदुरिन्द्रम् । प्रियमेधा ऋषयो नाधमानाः ।

अप ध्वान्तमूर्णुहि पूर्धि चक्षुः । मुमुग्ध्यस्मान् निधयेव बद्धान् ॥ {15}

({15} appearing in T.B.2.5.8.3)

Details of Dasini&Vaakyams for – Prapaatakam7 – TA 7

	Dasini	Vaakyams
Anuvakam 1	1	4
Anuvakam 2	6	59
Anuvakam 3	3	36
Anuvakam 4	1	12
Anuvakam 5	7	71
Anuvakam 6	3	29
Anuvakam 7	5	52
Anuvakam 8	5	49
Anuvakam 9	4	38
Anuvakam 10	6	57
Anuvakam 11	9	88
Anuvakam 12	1	4
Anuvakam 13	1	7
Anuvakam 14	1	7
Anuvakam 15	1	3
Anuvakam 16	1	4
Anuvakam 17	1	11
Anuvakam 18	1	7
Anuvakam 19	1	19
Anuvakam 20	3	30
Anuvakam 21	1	16

सप्तमः प्रपाठकः – (TA 7)

Anuvakam 22	1	9
Anuvakam 23	1	8
Anuvakam 24	1	2
Anuvakam 25	1	3
Anuvakam 26	1	5
Anuvakam 27	1	3
Anuvakam 28	1	17
Anuvakam 29	1	4
Anuvakam 30	1	5
Anuvakam 31	1	4
Anuvakam 32	1	3
Anuvakam 33	1	4
Anuvakam 34	1	6
Anuvakam 35	1	3
Anuvakam 36	1	10
Anuvakam 37	1	6
Anuvakam 38	1	6
Anuvakam 39	1	8
Anuvakam 40	1	6
Anuvakam 41	7	68
Anuvakam 42	6	57
Total →	94	840

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

8 कृष्ण यजुर्वेदीय तैत्तिरीय आरण्यके अष्टमः प्रपाठकः

8.1 अष्टमः प्रपाठकः

अनुवाकम् - 1

T.A.8.1.1

दे॒वा वै॑ स॒त्रमा॑सत । ऋ॒द्धि॑परि॒मितम्॑ य॒शस्का॑माः । ते॑ऽब्रु॒वन् ।
य॒न्नः प्र॑थ॒मं य॑श॒ ऋ॒च्छात् । सर्व॑षा-॒न्नस्त॑त्-स॒हास॑दिति ।
तेषा॑म् कु॒रुक्षे॑त्रं वे॒दि॒रासी॑त् । तस्यै॑ खाण्ड॒वो द॑क्षिणा॒र्द्ध आ॑सीत् ।
तू॒र्ध्नमु॑त्त॒रा॒र्द्धः । प॒रीण॑ज्जघ॒ना॒र्द्धः । म॒रव॑ उत्करः । 1 (10)

T.A.8.1.2

तेषा॑म् म॒खं वै॑ष्ण॒वं य॑श॒ आ॒र्च्छ॑त् । त॒न्य॑का॒मय॑त । तेना॑पा॒क्राम॑त् ।
तम् दे॒वा अ॒न्वाय॑न् । य॒शो॑ऽव॒रु॒रुथ्स॑मानाः । तस्या॑न्वा॒गत॑स्य ।
स॒व्या॒द्ध॒नुर॑जायत । दक्षि॑णा॒दिष॑वः । तस्मा॑दिषु॒धन्व॑म् पु॒ण्य॑जन्म ।
य॒ज्ञ॑जन्मा हि । 2 (10)

T.A.8.1.3

तमेकं॑ सन्तम्॑ । ब॒हवो॑ नाभ्य॑धृष्णुवन् । तस्मा॑देक॑मिषु॑धन्वि॑नम् ॥
 ब॒हवो॑ऽनिषु॑धन्वा नाभि॑धृष्णुवन्ति । सोऽस्म॑यत । एक॑म् मा सन्तम्
 ब॒हवो॑ नाभ्य॑धर्षिषु॑रिति । तस्य॑ सिष्मि॑याणस्य॑ तेजोऽपा॑क्रामत् ॥
 तद्-दे॒वा ओष॑धीषु॑ न्यमृ॑जुः । ते श्या॑माका॑ अभवन् ।

स्मया॑का वै नामै॑ते । 3 (10)

T.A.8.1.4

तथ् स्मया॑कानां॑ स्मया॑कत्वम् । तस्मा॑द्-दीक्षि॑तेनापि॑गृह्य॑ स्मेत॑व्यम् ॥
 तेज॑सो धृ॒त्यै । स धनुः॑ प्रतिष्क॑भ्यातिष्ठत् । ता उप॑दीका॑ अब्रुवन्-
 वरम्॑ वृ॒णाम॑है । अथ॑ व इमं॑ रन्ध॑याम । यत्र॑ क्व च॑ खना॑म ।
 तदपोऽभितृ॑णदामे॑ति । तस्मा॑दुप॑दीका॑ यत्र॑ क्व च॑ खनन्ति ।
 तदपोऽभितृ॑न्दन्ति । 4 (10)

T.A.8.1.5

वा॒रेवृ॑तं॑ ह्या॒साम् । तस्य॑ ज्या॒मप्या॑दन् । तस्य॑ धनु॑र्विप्रव॑माणं॑
 शि॒र उद॑वर्तयत् । तद् द्या॑वापृथि॒वी अनु॑प्रावर्तत । यत् प्रा॑वर्तत ।
 तत् प्र॑वर्ग्यस्य॑ प्रवर्ग्य॑त्वम् । यद्घ्राँ(४) इत्य॑पतत् ।

तद्धर्मस्य॑ घर्मत्वम् । महतो॑ वीर्यमपप्तदिति॑ ।

तन् महावीरस्य॑ महावीरत्वम् । 5 (10)

T.A.8.1.6

यदस्याः॑ समभरन् । तथ् स॒म्राज्ञः॑ स॒म्राट्त्वम् । त॒ स्तृतम्
 देवता॑स्त्रेधा॒ व्यगृह्णत॑ । अ॒ग्निः प्रा॒तस्स॒वनम् । इन्द्रो॑ मा॒द्ध्यन्दि॒नः
 स॒वनम् । विश्वे॑ दे॒वास्तृ॒तीयस॒वनम् । तेनाप॑शीर्षा॒ यज्ञेन॑ यज॒मानाः ।
 नाशिषो॑ऽवारुन्धत । न सु॒वर्गं॑ लो॒कम॒भ्यज॑यन् ।

ते दे॒वा अ॒श्विनाव॑ब्रुवन् । 6 (10)

T.A.8.1.7

भिष॒जौ वै स्थः॑ । इ॒दं य॒ज्ञस्य॑ शि॒रः प्र॒तिध॑त्तमिति॑ । ताव॑ब्रूतां॒ वरम्
 वृ॒णाव॑है । ग्र॒ह ए॒व ना॒वत्रा॑पि गृह्यतामिति॑ । ताभ्या॑-मे॒तमा॒श्विन-
 म॒गृह्णन् । तावे॒तद्-य॒ज्ञस्य॑ शि॒रः प्र॒त्यध॑त्ताम् । यत् प्र॒वर्ग्यः॑ ।
 तेन॑ स॒शीर्षा॑ य॒ज्ञेन॑ यज॒मानाः । अ॒वाशि॑षोऽरुन्धत । अ॒भि सु॒वर्गं
 लो॒कम॑जयन् () । यत् प्र॒वर्ग्यम्॑ प्र॒वृण॑क्ति । य॒ज्ञस्यै॒व तच्छि॑रः
 प्र॒तिद॑धाति । तेन॑ स॒शीर्षा॑ य॒ज्ञेन॑ यज॒मानः । अ॒वाशि॑षो॒ रुन्धे॑ ।

अभि सुवर्गं लो॒कम् ज॒यति । तस्मा॒देष आ॒श्विनप्र॒वया इ॒व ।

यत् प्र॒वर्ग्यः । 7 (17)

(उ॒त्करो - ह्ये - ते - तृ॒न्दन्ति - महा॒वीर॒त्व - म॒ब्रुवन् -

न॒जयन्थ॒ सप्त॒ च) (A1)

अनुवाकम् - 2

T.A.8.2.1

सा॒वि॒त्रम् जु॒होति॑ प्र॒सू॒त्यै ॥ च॒तु॒र्गृ॒ही॒तेन॑ जु॒होति॑ । च॒तु॒ष्पादः
प॒शवः॑ । प॒शू॒नेवा॒वरु॒न्धे । च॒तस्रो॑ दि॒शः । दि॒क्ष्वे॒व प्र॒ति॒ति॒ष्ठति॑ ।
छन्दा॑सि॒ दे॒वेभ्यो॑ऽपा॒क्रामन् । न वो॑ऽभा॒गानि॑ ह॒व्यं व॑क्ष्याम॒ इति॑ ।
तेभ्य॑ ए॒त-च॒तु॒र्गृ॒ही॒त-म॑धारयन् । पु॒रो॒नु॒वा॒क्यायै॑ या॒ज्यायै॑ । 8 (10)

T.A.8.2.2

दे॒वता॑यै॒ वषट्कारा॑य । यच्च॑तु॒र्गृ॒ही॒तम् जु॒होति॑ । छन्दा॑स्ये॒व तत्
प्री॑णाति । तान्य॑स्य॒ प्री॒तानि॑ दे॒वेभ्यो॑ ह॒व्यं व॑हन्ति । ब्र॒ह्मवा॑दि॒नो
वद॑न्ति । हो॒तव्य॑म् दी॒क्षित॑स्य॒ गृ॒हा(३) इ॒ न हो॑तव्या(३) मिति॑ ।
ह॒विर्वै दी॑क्षितः । यज्जु॑हु॒यात् । ह॒विष्कृतं॑ य॒जमान॑म॒ग्नौ प्र॑द॒ध्यात् ।
यन्न॑ जु॒हुयात् । 9 (10)

T.A.8.2.3

य॒ज्ञप॑रुरन्तरियात् । य॒जुरे॑व वदेत् । न ह॒विष्कृतं॑ य॒जमान॑मग्नौ
 प्र॒दधा॑ति । न य॒ज्ञप॑रुरन्तरेति । गाय॒त्री छ॒न्दा॑स्यत्यमन्यत ।
 तस्यै॑ वषट्कारोऽभ्यय्य शिरोऽच्छिनत् । तस्यै॑ द्वेधा रसः पराऽपतत् ।
 पृथि॒वीम॑र्द्धः प्राविशत् । प॒शून्म॑र्द्धः । यः पृथि॒वीम् प्रा॑विशत् । 10 (10)

T.A.8.2.4

स ख॒दिरोऽ॑भवत् । यः प॒शून् । सोऽ॑जाम् । यत्खा॑दिर्यभिर् भवति ।
 छ॒न्द॑सामेव रसेन य॒ज्ञस्य॑ शिरः सम्भरति । यदौदु॑म्बरी ।
 ऊ॒र्वा उ॑दुम्बरः । ऊ॒र्जे॑व य॒ज्ञस्य॑ शिरः सम्भरति ।
 यद्-वै॑णवी । तेजो॒ वै वे॑णुः । 11 (10)

T.A.8.2.5

तेज॑सैव य॒ज्ञस्य॑ शिरः सम्भरति । यद्-वै॑कङ्कती । भा ए॒वाव॑रुन्धे ।
 दे॒वस्य॑ त्वा स॒वितुः॑ प्र॒सव॑ इत्यभि॒माद॑त्ते प्र॒सूत्यै॑ ।
 अ॒श्विनो॑र्-बाहुभ्यामित्याह । अ॒श्विनो॑ हि दे॒वाना॑मध्वर्यू आस्ताम् ।
 पू॒ष्णो ह॑स्ताभ्यामित्याह यत्यै॑ । व॒ज्र इ॒व वा ए॒षा । यद॑भिः ।
 अ॒भिर॑सि ना॒रिर॑सीत्याह शान्त्यै॑ । 12 (10)

T.A.8.2.6

अ॒ध्व॒र॒कृ॒द्-दे॒वेभ्य॑ इत्याह । य॒ज्ञो वा अ॒ध्व॒रः । य॒ज्ञ॒कृ॒द्-दे॒वेभ्य॑
इति॑ वावै॒तदा॑ह । उ॒त्तिष्ठ॑ ब्र॒ह्मण॑स्प॒त इत्या॑ह । ब्र॒ह्मणै॑व य॒ज्ञस्य॑
शिरो॑ऽच्छैति । प्रै॒तु ब्र॒ह्मण॑स्प॒तिरि॒त्याह॑ । प्रेत्यै॑व य॒ज्ञस्य॑ शिरो॑ऽच्छैति ।
प्र दे॒व्येतु॑ सू॒नृते॑त्याह । य॒ज्ञो वै सू॒नृता॑ ॥
अच्छा॑ वी॒रन्न॑र्यम् प॒ङ्क्ति॑राध॒समि॒त्याह॑ । 13 (10)

T.A.8.2.7

पा॒ङ्क्तो हि॑ य॒ज्ञः । दे॒वा य॒ज्ञन्न॑यन्तु न इत्याह । दे॒वाने॑व य॒ज्ञनि॑यः
कुरु॑ते । दे॒वी द्या॑वापृ॒थि॒वी अनु॑ मे म॒सा॒थामि॒त्याह॑ ।
आ॒भ्यामे॑वा॒नुम॑तो य॒ज्ञस्य॑ शि॒रः सम्भ॑रति । ऋ॒द्ध्या॑स॒मद्य॑ म॒खस्य॑
शि॒र इत्या॑ह । य॒ज्ञो वै म॒खः । ऋ॒द्ध्या॑स॒मद्य॑ य॒ज्ञस्य॑ शि॒र इति॑
वावै॒तदा॑ह । म॒खाय॑ त्वा म॒खस्य॑ त्वा शी॒र्ष्णा इत्या॑ह ।
निर्दि॑श्यै॒वैन॑द्धरति । 14 (10)

T.A.8.2.8

त्रि॑र॒हर॑ति । त्रय॑ इ॒मे लो॒काः । ए॒भ्य ए॒व लो॒केभ्यो॑ य॒ज्ञस्य॑ शि॒रः
सम्भ॑रति । तू॒ष्णीम् च॑तु॒र्थं ह॑रति । अ॒परि॑मि॒तादे॒व य॒ज्ञस्य॑ शि॒रः

सम्भरति । मृत्खनादग्रे हरति । तस्मान् मृत्खनः करुण्यतरः ।
 इयत्यग्र आसीरित्याह । अस्यामेवाछम्बट्कारं यज्ञस्य शिरः सम्भरति ।
 ऊर्जम् वा एतत् रसम् पृथिव्या उपदीका उद्दिहन्ति । 15 (10)

T.A.8.2.9

यद्-वल्मीकम् । यद्-वल्मीकवपा सम्भारो भवति । ऊर्जमेव रसम्
 पृथिव्या अवरुन्धे । अथो श्रोत्रमेव । श्रोत्रञ्च ह्येतत् पृथिव्याः ।
 यद्-वल्मीकः । अबधिरो भवति । य एवं वेद । इन्द्रो वृत्राय
 वज्रमुदयच्छत् । स यत्रयत्र पराक्रमत । 16 (10)

T.A.8.2.10

तन्नादिध्रियत । स पूतीकस्तम्बे पराक्रमत । सोऽदिध्रियत । सोऽब्रवीत् ।
 ऊतिं वै मे धा इति । तदूतीकाना-मूतीकत्वम् । यदूतीका भवन्ति ।
 यज्ञायैवोतिम् दधति । अग्निजा असि प्रजापते रेत इत्याह ।
 य एव रसः पशून् प्राविशत् । 17 (10)

T.A.8.2.11

तमेवावरुन्धे । पञ्चैते सम्भारा भवन्ति । पाङ्को यज्ञः । यावानेव
 यज्ञः । तस्य शिरः सम्भरति । यद्ग्राम्याणाम् पशूनाञ्चर्मणा

सम्भरेत् । ग्राम्यान् पशूञ्छुचाऽर्पयेत् । कृष्णाजिनेन सम्भरति ।
 आरण्यानेव पशूञ्छुचाऽर्पयति । तस्मात्-समावत्-पशूनाम्
 प्रजायमानानाम् । 18 (10)

T.A.8.2.12

आरण्याः पशवः कनीयाऽसः । शुचा ह्यृताः । लोमतः सम्भरति ।
 अतो ह्यस्य मेद्ध्यम् । परिगृह्या यन्ति । रक्षसामपहत्यै । बहवो
 हरन्ति । अपचितिमेवास्मिन् दधति । उद्धते सिकतोपोप्ते परिश्रिते
 निदधति शान्त्यै । मदन्तीभिरुप सृजति । 19 (10)

T.A.8.2.13

तेज एवास्मिन् दधाति । मधु त्वा मधुला करोत्वित्याह । ब्रह्मणैवास्मिन्
 -तेजो दधाति । यद्ग्राम्याणाम् पात्राणाम् कपालैः सऽसृजेत् ।
 ग्राम्याणि पात्राणि शुचाऽर्पयेत् । अर्मकपालैः सऽसृजति । एतानि
 वा अनुपजीवनीयानि । तान्येव शुचाऽर्पयति । शर्कराभिः सऽसृजति
 धृत्यै । अथो शन्त्वाय () । अजलोमैः सऽसृजति । एषा वा अग्नेः
 प्रिया तनूः । यदजा । प्रिययैवैनम् तनुवा सऽसृजति । अथो तेजसा ।

कृ॒ष्णा॒जिन॒स्य॒ लो॒म॒भिः॑ स॒सृ॒जति॑ । य॒ज्ञो॒ वै कृ॒ष्णा॒जिन॒म् ।

य॒ज्ञे॒नै॒व य॒ज्ञ॒सृ॒जति॑ । 20 (18)

(या॒जा॒यै – न जु॒हु॒या – द॒वि॒शद् – वे॒णुः – शान्त्यै॑ –

प॒ङ्क्ति॑रा॒धस॒मित्या॑ह – ह॒रति॑ – दि॒हन्ति॑ – प॒रा॒क्रम॑ – ता॒वि॒शत् –

प्र॒जा॒य॒मा॒ना॒ना॒सृ॒जति॑ – श॒न्त्वा॒या ष्ठी॑ च) (A2)

अनुवाकम् – 3

T.A.8.3.1

परि॒श्रिते॑ करोति । ब्र॒ह्म॒वर्च॑स॒स्य॒ परि॑गृहीत्यै ॥ न कु॒र्वन्न॒भि प्रा॑ण्यात् ॥

यत् कु॒र्वन्न॒भि प्रा॑ण्यात् । प्रा॒णाञ्छु॒चाऽर्प॑येत् । अ॒पहा॑य प्रा॒णिति॑ ।

प्रा॒णा॒नाम् गो॑पी॒थाय॑ ॥ न प्र॒वर्ग्य॑म्-चा॒दित्य॑म्-चा॒न्त॒रेया॑त् ।

यद॒न्त॒रेया॑त् । दु॒श्च॒र्मा स्या॑त् ॥ 21 (10)

T.A.8.3.2

तस्मा॒न्नान्तरा॑य्यम् ॥ आ॒त्म॒नो गो॑पी॒थाय॑ । वे॒णु॒ना करो॑ति ।

ते॒जो॒ वै वे॒णुः । ते॒जः प्र॒वर्ग्यः॑ । ते॒ज॒सै॒व ते॒जः स॒म॒र्द्ध॑यति ।

म॒ख॒स्य शि॒रोऽसी॑त्याह । य॒ज्ञो॒ वै म॒खः । तस्यै॑तच्छि॒रः ।

यत् प्र॒वर्ग्यः॑ । 22 (10)

T.A.8.3.3

तस्मा॑दे॒वमा॑ह । य॒ज्ञस्य॑ प॒दे स्थ॑ इत्या॒ह । य॒ज्ञस्य॑ ह्ये॒ते प॒दे ।
अथो॑ प्र॒तिष्ठि॑त्यै । गा॒यत्रेण॑ त्वा छ॒न्दसा॑ करो॒मीत्या॑ह । छ॒न्दोभि॑रे॒वैन॑म्
करोति॑ । न्यु॒द्धि॑म् करोति॑ । त्रय॑ इ॒मे लो॒काः । ए॒षान् लो॒काना॑माप्त्यै॑ ॥
छ॒न्दोभिः॑ करोति॑ । 23 (10)

T.A.8.3.4

वी॒र्य॑म् वै छ॒न्दा॑सि । वी॒र्ये॑णै॒वैन॑म् करोति॑ । य॒जुषा॑ बि॒लम् करोति॑
व्या॒वृ॒त्यै । इ॒यन्त॑म् करोति॑ । प्र॒जाप॑तिना य॒ज्ञमु॒खेन॑ सम्मि॒तम् ।
इ॒यन्त॑म् करोति॑ । य॒ज्ञप॑रुषा सम्मि॒तम् । इ॒यन्त॑म् करोति॑ ।
ए॒ताव॑द्वै पु॒रुषे॑ वी॒र्य॑म् । वी॒र्य॑सम्मि॒तम् । 24 (10)

T.A.8.3.5

अ॒परि॑मितम् करोति॑ । अ॒परि॑मितस्या॒वरु॑द्ध्यै । प॒रिग्री॑वम् करोति॑ धृ॒त्यै ॥
सूर्य॑स्य॒ हर॑सा श्रा॒येत्या॑ह । य॒थाय॑जु॒रेवै॑तत् । अ॒श्वश॑केन॒ धूप॑यति ।
प्रा॒जाप॑त्यो वा अ॒श्वः स॑यो॒नित्वा॑य । वृ॒ष्णो अ॒श्वस्य॑ नि॒ष्पद॑सीत्या॒ह ।
अ॒सौ वा आ॑दि॒त्यो वृ॒षाऽश्वः॑ । तस्य॑ छ॒न्दा॑सि नि॒ष्पत् । 25 (10)

T.A.8.3.6

छन्दो॑भिरेवैन॑म् धूपयति । अर्चि॑षे॒ त्वा शोचि॑षे त्वेत्या॑ह ।
 तेज॑ ए॒वास्मिन् दधा॑ति । वारु॑णोऽभी॒द्धः । मैत्रि॑योपैति॒ शान्त्यै॑ ॥
 सिद्ध्यै॑ त्वेत्या॑ह । यथा॑यजुरेवैतत् । देव॑स्त्वा स॒वितो॑द्वपत्वित्या॑ह ।
 स॒वितृ॑प्रसूत ए॒वैन॑म् ब्रह्म॑णा दे॒वता॑भिरुद्वपति ।
 अप॑द्यमानः पृथि॒व्यामाशा॑ दि॒श आ॒पृणे॑त्याह । 26 (10)

T.A.8.3.7

तस्मा॑दग्निः सर्वा॑ दि॒शोऽनु॑ विभा॑ति । उत्ति॑ष्ठ बृ॒हन्-भवो॑र्ध्वस्तिष्ठ
 ध्रु॒वस्त्वमि॑त्याह॒ प्रति॑ष्ठित्यै । ई॒श्वरो॑ वा ए॒षोऽन्धो॑ भवितोः ।
 यः प्र॑वर्ग्यमन्वीक्षते । सूर्य॑स्य त्वा चक्षु॑षाऽन्वीक्ष॒ इत्या॑ह ।
 चक्षु॑षो गोपी॒थाय॑ । ऋ॒जवे॑ त्वा सा॒धवे॑ त्वा सु॒क्षित्यै॑
 त्वा भू॒त्यै त्वेत्या॑ह । इ॒यं वा॑ ऋ॒जुः । अ॒न्तरि॑क्षꣳ सा॒धु ।
 असौ॑ सु॒क्षितिः॑ । 27 (10)

T.A.8.3.8

दि॒शो भू॑तिः । इ॒माने॑वास्मै॒ लोकान्॑ कल्पयति । अथो॒ प्रति॑ष्ठित्यै ।
इद॒-मह॒-ममु॑मामुष्यायणम्॒ विशा॑ पशुभिर्-ब्रह्मवर्चसेन
पर्यू॑हामीत्याह । विशै॑वैनम् पशुभिर्-ब्रह्मवर्चसेन पर्यू॑हति ।
विशे॑ति राजन्यस्य ब्रूयात् । विशै॑वैनम् पर्यू॑हति । पशु॑भिरिति वैश्यस्य ।
पशु॑भिरेवैनम् पर्यू॑हति । असु॑र्यम् पात्रमनाच्छृण्णम् । 28 (10)

T.A.8.3.9

आच्छृ॑णत्ति । दे॒वत्रा॑ऽकः । अ॒जक्षी॑रेणाच्छृ॑णत्ति । पर॒मं वा॑ एतत्
पयः॑ । यद॒जक्षी॑रम् । पर॒मेणै॑वैनम् पयसाऽऽच्छृ॑णत्ति । यजु॑षा
व्यावृ॑त्त्यै । छन्दो॑भिराच्छृ॑णत्ति । छन्दो॑भिर्वा एष क्रियते । छन्दो॑भिरेव
छन्दा॑ऽस्याच्छृ॑णत्ति () । छृ॒न्धि वा॒चमित्या॑ह । वाच॑मेवावरुन्धे ।
छृ॒न्ध्यूर्ज॑मित्याह । ऊ॒र्जमे॑वावरुन्धे । छृ॒न्धि ह॒विरित्या॑ह । ह॒विरे॑वाकः ।
दे॒व पुर॑श्चर सध्यासन्त्वेत्याह । यथा॑यजुरेवैतत् । 29 (18)

(स्याद्- यत् प्र॑वर्ग्यः - छन्दो॑भिः करोति - वी॒र्यं॑ सम्मितम् -
छन्दा॑ऽसि निष्यत् - पृ॒णेत्या॑ह - सु॒क्षिति॑ - रना॑च्छृण्णम् -

छन्दा७स्याच्छृण त्यष्टौ च) (A3)

अनुवाकम् - 4

T.A.8.4.1

ब्रह्मन् प्रचरिष्यामो होतर्-घर्ममभिष्टुहीत्याह । एष वा एतर्.हि
 बृहस्पतिः । यद्ब्रह्मा । तस्मा एव प्रतिप्रोच्य प्रचरति ।
 आत्मनोऽनात्यै । यमाय त्वा मखाय त्वेत्याह । एता वा एतस्य
 देवताः । ताभिरेवैन७ समर्द्धयति । मदन्तीभिः प्रोक्षति ।
 तेज एवास्मिन् दधाति । 30 (10)

T.A.8.4.2

अभिपूर्वम् प्रोक्षति । अभिपूर्व-मेवास्मिन्-तेजो दधाति ।
 त्रिः प्रोक्षति । त्र्यावृद्धि यज्ञः । अथो मेद्ध्यत्वाय । होताऽन्वाह ।
 रक्षसामपहत्यै । अनवानम् । प्राणाना७ सन्तत्यै ।
 त्रिष्टुभः सतीर्-गायत्रीरिवान्वाह । 31 (10)

T.A.8.4.3

गायत्रो हि प्राणः । प्राणमेव यजमाने दधाति । सन्ततमन्वाह ।
 प्राणानामन्नाद्यस्य सन्तत्यै । अथो रक्षसामपहत्यै ।

यत् परिमिता अनुब्रूयात् । परिमितमवरुन्धीत । अपरिमिता अन्वाह ।
अपरिमितस्यावरुद्ध्यै । शिरो वा एतद्-यज्ञस्य । 32 (10)

T.A.8.4.4

यत् प्रवर्ग्यः । ऊर्ध्वमुञ्जाः । यन् मौञ्जो वेदो भवति । ऊर्जैव
यज्ञस्य शिरः समर्द्धयति । प्राणाहुतीर्-जुहोति । प्राणानेव यजमाने
दधाति । सप्त जुहोति । सप्त वै शीर्षण्याः प्राणाः । प्राणाने
वास्मिन् दधाति । देवस्त्वा सविता मद्ध्वाऽनक्त्वित्याह । 33 (10)

T.A.8.4.5

तेजसैवैनमनक्ति । पृथिवीम् तपसस्त्रायस्वेति हिरण्यमुपास्यति ।
अस्या अनतिदाहाय । शिरो वा एतद्-यज्ञस्य । यत् प्रवर्ग्यः ।
अग्निः सर्वा देवताः । प्रलवानादीप्योपास्यति ।
देवतास्वेव यज्ञस्य शिरः प्रतिदधाति । अप्रतिशीर्णाग्रम् भवति ।
एतद्-बर्हिर्ह्येषः । 34 (10)

T.A.8.4.6

अर्चिरसि शोचिरसीत्याह । तेज एवास्मिन् ब्रह्मवर्चसम् दधाति ।
सःसीदस्व महान् असीत्याह । महान् ह्येषः । ब्रह्मवादिनो वदन्ति ।

ए॒ते वा॒व त ऋ॒त्विजः॑ । ये॒ दर्श॑पूर्ण॒मास॒योः॑ । अथ॑ क॒था हो॒ता
य॒जमा॑नाया॒शिषो॑ नाशा॒स्त इति॑ । पु॒रस्ता॑दाशीः॒ खलु॑ वा
अ॒न्यो य॒ज्ञः । उ॒परि॑ष्ठादाशीर॒न्यः । 35 (10)

T.A.8.4.7

अ॒नाधृ॑ष्या पु॒रस्ता॑दिति॒ यदे॑तानि॒ यजू॑ष्याह॑ । शी॒र्षत॑ ए॒व य॒ज्ञस्य॑
य॒जमा॑न आ॒शिषो॑ऽव॒रुन्धे॑ । आ॒युः पु॒रस्ता॑दाह॑ । प्र॒जाम् दक्षि॑णतः ।
प्रा॒णम् प॒श्चात् । श्रो॒त्रमु॑त्तरतः । वि॒धृति॑मु॒परि॑ष्ठात् । प्रा॒णाने॒वास्मै॑
समी॑चो॒ दधा॑ति । ई॒श्वरो॑ वा ए॒ष दि॒शोऽनु॑न्मदितोः ।
य॒न्दि॒शोऽनु॑ व्या॒स्था॒पय॑न्ति । 36 (10)

T.A.8.4.8

म॒नोर॑श्वाऽसि॒ भूरि॑पु॒त्रेती॒मा-म॑भि॒मृश॑ति । इ॒यं वै॑ म॒नोर॑श्वा॒ भूरि॑पु॒त्रा ।
अ॒स्यामे॒व प्र॑ति॒तिष्ठ॑त्यनु॒न्मादा॑य । सू॒पस॑दा॒ मे भू॒या मा॒ मा
हि॒ऽसी॒रित्या॑हा॒हि॒ऽसा॑यै । चि॒तः स्थ॑ परि॒चित॑ इत्याह॑ ।
अ॒पचि॑ति॒मेवा॑स्मिन् दधाति । शि॒रो वा ए॒तद्-य॒ज्ञस्य॑ । यत् प्र॑व॒र्ग्यः ।
अ॒सौ खलु॑ वा आ॒दित्यः॑ प्र॒वर्ग्यः॑ । तस्य॑ म॒रुतो॑ र॒श्मयः॑ । 37 (10)

T.A.8.4.9

स्वाहा मरुद्भिः परिश्रयस्वेत्याह । अमुमेवादित्यं रश्मिभिः पर्यूहति ।
 तस्माद्-दसावादित्योऽमुष्मिन् लोके रश्मिभिः पर्यूढः । तस्माद्-राजा
 विशा पर्यूढः । तस्माद्-ग्रामणीः सजातैः पर्यूढः । अग्नेः सृष्टस्य
 यतः । विकङ्कतम् भा आच्छत् । यद् वैकङ्कताः परिधयो भवन्ति ।
 भा एवावरुन्धे । द्वादश भवन्ति । 38 (10)

T.A.8.4.10

द्वादश मासाः सम्वत्सरः । सम्वत्सरमेवावरुन्धे । अस्ति त्रयोदशो
 मास इत्याहुः । यत् त्रयोदशः परिधिर्भवति । तेनैव त्रयोदशम्
 मासमवरुन्धे । अन्तरिक्षस्यान्तर्-द्विरसीत्याह व्यावृत्तै ।
 दिवम् तपसस्त्रायस्वे-त्युपरिष्ठा-द्विरण्यमधि निदधाति ।
 अमुष्या अनतिदाहाय । अथो आभ्यामेवैनमुभयतः परिगृह्णाति ।
 अर्हन् बिभर्षि सायकानि धन्वेत्याह । 39 (10)

T.A.8.4.11

स्तौत्येवैनमेतत् । गायत्रमसि त्रैष्टुभमसि जागतमसीति धवित्राण्यादत्ते ।
 छन्दोभिरेवैनान्यादत्ते । मधु मध्विति धूनोति । प्राणो वै मधु ।

प्राणमेव यजमाने दधाति । त्रिः परियन्ति । त्रिवृद्धि प्राणः ।

त्रिः परियन्ति । त्र्यावृद्धि यज्ञः । 40 (10)

T.A.8.4.12

अथो रक्षसामपहत्यै । त्रिः पुनः परियन्ति । षट्त् सम्पद्यन्ते ।

षड्वा ऋतवः । ऋतुष्वेव प्रतितिष्ठन्ति । यो वै घर्मस्य प्रियान्-

तनुवमाक्रामति । दुश्कर्मा वै स भवति । एष ह वा अस्य

प्रियान् तनुवमाक्रामति । यत् त्रिः परीत्य चतुर्थम् पर्येति ।

एताञ् ह वा अस्योग्रदेवो राजनिराचक्राम । 41 (10)

T.A.8.4.13

ततो वै स दुश्कर्माऽभवत् । तस्मात् त्रिः परीत्य न चतुर्थम् परीयात् ।

आत्मनो गोपीथाय । प्राणा वै धवित्राणि । अव्यतिषङ्गम् धून्वन्ति ।

प्राणाना-मव्यतिषङ्गाय क्लृप्त्यै ॥ विनिषद्य धून्वन्ति । दिक्ष्वेव

प्रतितिष्ठन्ति । ऊर्ध्वन्धून्वन्ति ॥ सुवर्गस्य लोकस्य

समष्ट्यै () । सर्वतो धून्वन्ति । तस्मादयञ् सर्वतः पवते । 42 (12)

(दधा- तीवान्वाह - यज्ञ - स्याहै - ष - उपरिष्ठादाशीरन्यो -
 व्यास्थापयन्ति - रश्मयो - भवन्ति - धन्वेत्याह - यज्ञ -
 श्रक्राम - समष्ट्यै द्वे च) (A4)

अनुवाकम् - 5

T.A.8.5.1

अग्निष्ट्वा वसुभिः पुरस्ताद्-रोचयतु गायत्रेण छन्दसेत्याह ।
 अग्निरेवैनं वसुभिः पुरस्ताद्-रोचयति गायत्रेण छन्दसा ।
 स मा रुचितो रोचयेत्याह । आशिषमेवैतामाशास्ते । इन्द्रस्त्वा
 रुद्रैर्-दक्षिणतो रोचयतु त्रैष्टुभेन छन्दसेत्याह । इन्द्र एवैनं रुद्रैर्-
 दक्षिणतो रोचयति त्रैष्टुभेन छन्दसा । स मा रुचितो रोचयेत्याह ।
 आशिषमेवैतामाशास्ते । वरुणस्त्वाऽऽदित्यैः पश्चाद्-रोचयतु
 जागतेन छन्दसेत्याह । वरुण एवैनमादित्यैः पश्चाद्-रोचयति
 जागतेन छन्दसा । 43 (10)

T.A.8.5.2

स मा रुचितो रोचयेत्याह । आशिषमेवैतामाशास्ते ॥ द्युतानस्त्वा
 मारुतो मरुद्धिरुत्तरतो रोचयत्वानुष्टुभेन छन्दसेत्याह । द्युतान एवैनम्
 मारुतो मरुद्धिरुत्तरतो रोचयत्वानुष्टुभेन छन्दसा । स मा रुचितो
 रोचयेत्याह । आशिषमेवैतामाशास्ते ॥ बृहस्पतिस्त्वा विश्वैर्-
 देवैरुपरिष्ठाद्-रोचयतु पाङ्केन छन्दसेत्याह । बृहस्पतिरेवैनम् विश्वैर्-
 देवैरुपरिष्ठाद्-रोचयति पाङ्केन छन्दसा । स मा रुचितो रोचयेत्याह ।
 आशिषमेवैतामाशास्ते ॥ 44 (10)

T.A.8.5.3

रोचितस्त्वम् देव घर्म देवेष्वसीत्याह । रोचितो ह्येष देवेषु ।
 रोचिषीयाहम् मनुष्येष्वित्याह । रोचत एवैष मनुष्येषु । सम्राड् घर्म
 रुचितस्त्वन् देवेष्वायुष्माञ् स्तेजस्वी ब्रह्मवर्चस्यसीत्याह ।
 रुचितो ह्येष देवेष्वायुष्माञ् स्तेजस्वी ब्रह्मवर्चसी । रुचितोऽहम्
 मनुष्येष्वायुष्माञ् स्तेजस्वी ब्रह्मवर्चसी भूयासमित्याह । रुचित एवैष
 मनुष्येष्वायुष्माञ् स्तेजस्वी ब्रह्मवर्चसी भवति । रुगसि रुचम् मयि

धेहि मयि रुगित्याह । आशिषमेवैतामाशास्ते () । तं यदेतैर्-
यजुर्भिररोचयित्वा । रुचितो घर्म इति प्रब्रूयात् । अरोचुकोऽध्वर्युः
स्यात् । अरोचुको यजमानः । अथ यदेनमेतैर्यजुर्भी रोचयित्वा ।
रुचितो घर्म इति प्राह । रोचुकोऽध्वर्युर् भवति ।
रोचुको यजमानः । 45 (18)

(पश्चाद् रोचयति जगतेन छन्दसा - पाङ्गेन छन्दसा स मा रुचितो
रोचयेत्याहाशिषमेवैतामाशास्ते - शास्ते ऽष्टौ च) (A5)

अनुवाकम् - 6

T.A.8.6.1

शिरो वा एतद्-यज्ञस्य । यत् प्रवर्ग्यः । ग्रीवा उपसदः ।
पुरस्तादुपसदाम् प्रवर्ग्यम् प्रवृणक्ति । ग्रीवास्वेव यज्ञस्य शिरः
प्रतिदधाति । त्रिः प्रवृणक्ति । त्रय इमे लोकाः । एभ्य एव लोकेभ्यो
यज्ञस्य शिरोऽवरुन्धे । षट्त् सम्पद्यन्ते । षड्वा ऋतवः । 46 (10)

T.A.8.6.2

ऋतुभ्य एव यज्ञस्य शिरोऽवरुन्धे । द्वादश कृत्वः प्रवृणक्ति ।
द्वादश मासाः सम्वत्सरः । सम्वत्सरादेव यज्ञस्य शिरोऽवरुन्धे ।

चतुर्विंशतिः सम्पद्यन्ते । चतुर्विंशतिरर्द्धमासाः । अर्द्धमासेभ्य एव
यज्ञस्य शिरोऽवरुन्धे । अथो खलु । सकृदेव प्रवृज्यः ।

एकं हि शिरः । 47 (10)

T.A.8.6.3

अग्निष्टोमे प्रवृणक्ति । एतावान् वै यज्ञः । यावानग्निष्टोमः । यावानेव
यज्ञः । तस्य शिरः प्रतिदधाति । नोक्थ्ये प्रवृज्यात् । प्रजा वै पशव
उक्थानि । यदुक्थ्ये प्रवृज्यात् । प्रजाम् पशूनस्य निर्दहेत् ।

विश्वजिति सर्वपृष्ठे प्रवृणक्ति । 48 (10)

T.A.8.6.4

पृष्ठानि वा अच्युतञ्च्यावयन्ति । पृष्ठैरेवास्मा
अच्युतञ्च्यावयित्वाऽवरुन्धे । अपश्यम् गोपामित्याह । प्राणो वै
गोपाः । प्राणमेव प्रजासु वियातयति । अपश्यम् गोपामित्याह ।
असौ वा आदित्यो गोपाः । स हीमाः प्रजा गोपायति ।
तमेव प्रजानाम् गोप्तारम् कुरुते । अनिपद्यमानमित्याह । 49 (10)

T.A.8.6.5

न ह्येष निपद्यते । आ च परा च पथिभिश्चरन्तमित्याह । आ च ह्येष
 परा च पथिभिश्चरति । स सद्धीचीः स विषूचीर्वसान इत्याह ।
 सद्धीचीश्च ह्येष विषूचीश्च वसानः प्रजा अभि विपश्यति ।
 आ वरीवर्ति भुवनेष्वन्तरित्याह । आ ह्येष वरीवर्ति भुवनेष्वन्तः ।
 अत्र प्रावीर्मधु माद्ध्वीभ्याम् मधु माधूचीभ्यामित्याह ।
 वासन्तिकावेवास्मा ऋतू कल्पयति ।
 समग्निरग्निना गतेत्याह । 50 (10)

T.A.8.6.6

ग्रैष्मावेवास्मा ऋतू कल्पयति । समग्निरग्निना गतेत्याह ।
 अग्निर्ह्यैषोऽग्निना सङ्गच्छते । स्वाहा समग्निस्तपसा गतेत्याह ।
 पूर्वमेवादितम् । उत्तरेणाभिगृणाति । धर्ता दिवो विभासि रजसः
 पृथिव्या इत्याह । वार्षिकावेवास्मा ऋतू कल्पयति ।
 हृदे त्वा मनसे त्वेत्याह । शारदावेवास्मा ऋतू कल्पयति । 51 (10)

T.A.8.6.7

दिवि॑ दे॒वेषु॑ हो॒त्रा य॑च्छे॒त्याह॑ । हो॒त्राभि॑रेवे॒मान्ँ लो॒कान्थ्॑ सम् द॒धाति॑ ।
विश्वा॑साम् भु॒वाम् प॒त इ॒त्याह॑ । है॒मन्ति॑कावे॒वास्मा ऋ॒तू क॑ल्पयति ।
दे॒वश्रू॑स्त्वम् दे॒व घ॑र्म दे॒वान् पा॒हीत्या॑ह । शै॒शिरा॑वे॒वास्मा ऋ॒तू
क॑ल्पयति । त॒पोजांँ वा॑चम॒स्मे नि॑यच्छ दे॒वायु॑वमि॒त्याह॑ ।
या वै मे॒द्ध्य॑ वाक् । सा त॒पोजाः॑ । तामे॒वावरु॑न्धे । 52 (10)

T.A.8.6.8

ग॒र्भो दे॒वाना॑मि॒त्याह॑ । ग॒र्भो ह्ये॒ष दे॒वाना॑म् । पि॒ता म॑तीनामि॒त्याह॑ ।
प्र॒जा वै म॑तयः । ता॒सामे॑ष ए॒व पि॒ता । यत् प्र॑वर्ग्यः । तस्मा॑दे॒वमा॑ह ।
पतिः॑ प्र॒जाना॑मि॒त्याह॑ । पति॒र्ह्येष॑ प्र॒जाना॑म् ।
मतिः॑ क॒वीना॑मि॒त्याह॑ । 53 (10)

T.A.8.6.9

मति॒र्ह्येष॑ क॒वीना॑म् । सम् दे॒वो दे॒वेन॑ सवि॒त्रा ऽय॑तिष्ठ सꣳ
सूर्ये॑णा॒रुक्ते॑त्याह । अ॒मुञ्चै॒वादित्य॑म् प्र॒वर्ग्यञ्च॑ सꣳशा॑स्ति ।
आ॒युर्दा॑स्त्वम॒स्मभ्य॑म् घ॒र्म व॑र्चो॒दा अ॒सीत्या॑ह ।
आ॒शिष॑मे॒वैता॑माशा॒स्ते । पि॒ता नो॑ऽसि पि॒ता नो॑ बो॒धेत्या॑ह ।

बोधयत्येवैनम् । न वै तेऽवकाशा भवन्ति । पन्नियै दशमः ।

नव वै पुरुषे प्राणाः । 54 (10)

T.A.8.6.10

नाभिर्दशमी । प्राणानेव यजमाने दधाति । अथो दशाक्षरा विराट् ।
अन्नं विराट् । विराजैवान्नाद्यमवरुन्धे । यज्ञस्य शिरोऽच्छिद्यत ।
तद्-देवा होत्राभिः प्रत्यदधुः । ऋत्विजोऽवेक्षन्ते । एता वै होत्राः ।
होत्राभिरेव यज्ञस्य शिरः प्रतिदधाति । 55 (10)

T.A.8.6.11

रुचितमवेक्षन्ते । रुचिताद्वै प्रजापतिः प्रजा असृजत । प्रजानाञ्
सृष्ट्यै । रुचितमवेक्षन्ते । रुचिताद्वै पर्जन्यो वर्षति । वर्षुकः
पर्जन्यो भवति । सम् प्रजा एधन्ते । रुचितमवेक्षन्ते ।
रुचितम् वै ब्रह्मवर्चसम् । ब्रह्मवर्चसिनो भवन्ति । 56 (10)

T.A.8.6.12

अधीयन्तोऽवेक्षन्ते । सर्वमायुर्यन्ति । न पत्न्यवेक्षेत । यत् पत्न्यवेक्षेत ।
प्रजायेत । प्रजान्त्वस्यै निर्दहेत् । यन्नावेक्षेत । न प्रजायेत ।
नास्यै प्रजान्निर्दहेत् । तिरस्कृत्य यजुर् वाचयति () । प्रजायते ।

नास्यै॑ प्र॒जान्नि॑र्द॒हति॑ । त्व॒ष्टी॑मती ते स॒पेये॑त्याह ।

स॒पा॒ब्धि॑ प्र॒जाः प्र॒जाय॑न्ते । 57 (14)

(ऋ॒त॒वो - हि॑ शि॒रः - सर्व॑पृ॒ष्ठे प्र॑वृ॒ण - क्त्य॑नि॒पद्य॑मान॒मित्या॑ह -
ग॒तेत्या॑ह - शार॒दा॒वे॒वास्मा॑ ऋ॒तू क॑ल्प॒यति॑ - रु॒न्धे - क॒विना॑मित्या॒ह
- प्रा॒णाः - प्र॒ति॑द॒धाति॑ - भ॒वन्ति॑ - वा॒च॒यति॑ च॒त्वारि॑ च) (A6)

अनुवाकम् - 7

T.A.8.7.1

दे॒वस्य॑ त्वा स॒वितुः॑ प्र॒सव॑ इति॒ रश॑ना॒माद॑त्ते प्र॒सू॒त्यै॑ । अ॒श्विनो॑र्-
बा॒हु॒भ्या॑मित्या॒ह । अ॒श्विनो॑ हि दे॒वाना॑म॒ध्वर्यू॑ आ॒स्ताम्॑ । पू॒ष्णो
ह॒स्ता॑भ्या॒मित्या॑ह॒ यत्यै॑ । आ॒द॒दे॒दित्यै॑ रा॒स्ना॒सीत्या॑ह॒ यजु॑ष्कृत्यै ।
इ॒ड ए॒ह्यदि॑त॒ एहि॑ सर॒स्वत्ये॑हीत्या॒ह । ए॒तानि॑ वा अ॒स्यै॑ दे॒वना॑मानि ।
दे॒वना॑मै॒रेवै॑ना-मा॒ह्वय॑ति । अ॒सा॒वे॒ह्य-सा॒वे॒ह्य-सा॒वे॒हीत्या॑ह ।

ए॒तानि॑ वा अ॒स्यै॑ म॒नुष्य॑ना॒मानि॑ । 58 (10)

T.A.8.7.2

म॒नुष्य॑ना॒मैरे॑वै॒नामा॑ह्व॒यति॑ । षट्थ् सम्प॑द्यन्ते । षड्वा ऋ॒तवः॑ ।
ऋ॒तुभि॑रे॒वैना॑मा॒ह्वय॑ति । अ॒दित्या॑ उ॒ष्णीष॑म॒सीत्या॑ह । य॒थाय॑जु॒रेवै॑तत् ।

वा॒युर॒स्यै॒ड इ॒त्याह॑ । वा॒यु॒दे॒व॒त्यो॒ वै व॒थ्सः॑ ।

पू॒षा त्वो॒पाव॑सृ॒जत्वि॒त्याह॑ । पौ॒ष्णा वै दे॒व॒तया॑ प॒शवः॑ । 59 (10)

T.A.8.7.3

स्व॒यै॒वैन॑म् दे॒व॒तयो॑पाव॒सृज॑ति । अ॒श्वि॒भ्याम् प्र॑दा॒पये॑त्याह । अ॒श्वि॒नौ
वै दे॒वाना॑म् भि॒षजौ॑ ॥ ता॒भ्यामे॒वास्मै॑ भेष॒जम् क॑रोति । यस्ते॒ स्तनः॑
श॒शय॑ इ॒त्याह॑ । स्तौ॒त्ये॒वैना॑म् । उ॒स्र घ॑र्म॒ ऽ शि॒ ऽ षो॒स्र घ॑र्मम् पा॒हि
घ॒र्माय॑ शि॒ ऽ षे॒त्याह॑ । यथा॑ ब्रू॒याद॒मुष्मै॑ दे॒हीति॑ । ता॒दृगे॒व तत् ।

बृ॒ह॒स्पति॑स्त्वो॒पसी॑दत्वि॒त्याह॑ । 60 (10)

T.A.8.7.4

ब्र॒ह्म वै दे॒वाना॑म् बृ॒ह॒स्पतिः॑ । ब्र॒ह्म॒णै॒वैना॑मु॒पसी॑दति । दा॒नवः॑ स्थ
पे॒रव॑ इ॒त्याह॑ । मे॒द्ध्याने॑वै॒नान्क॑रोति । वि॒ष्व॒ग्वृ॒तो लो॑हि॒तेने॑त्याह
व्या॒वृ॒त्त्यै । अ॒श्वि॒भ्याम् पि॒न्वस्व॑ सर॒स्वत्यै॑ पि॒न्वस्व॑ पू॒ष्णो पि॒न्वस्व॑
बृ॒ह॒स्पत॑ये पि॒न्वस्वे॑त्याह । ए॒ताभ्यो॑ ह्ये॒षा दे॒वता॑भ्यः पि॒न्वते॑ ।
इ॒न्द्राय॑ पि॒न्वस्वे॑न्द्राय॑ पि॒न्वस्वे॑त्याह । इ॒न्द्रमे॒व भा॑ग॒धेये॑न॒ सम॑र्द्धयति ।
द्वि॒रि॒न्द्राये॑त्याह । 61 (10)

T.A.8.7.5

तस्मादिन्द्रो देवतानाम् भूयिष्ठभाक्तमः । गायत्रोऽसि त्रैष्टुभोऽसि
जागतमसीति शफोपयमानादत्ते । छन्दोभिरेवैनानादत्ते । सहोर्जो
भागेनोपमेहीत्याह । ऊर्ज एवैनम् भागमकः । अश्विनौ वा एतद्-
यज्ञस्य शिरः प्रतिदधतावब्रूताम् । आवाभ्यामेव पूर्वाभ्यां
वषट्क्रियाता इति । इन्द्राश्विना मधुनः सारघस्येत्याह ।
अश्विभ्यामेव पूर्वाभ्यां वषट्करोति । अथो अश्विनावेव
भागधेयेन समर्द्धयति । 62 (10)

T.A.8.7.6

घर्मम् पात वसवो यजता वडित्याह । वसूनेव भागधेयेन
समर्द्धयति । यद्-वषट्कुर्यात् । यातयामाऽस्य वषट्कारः स्यात् ।
यन्न वषट्कुर्यात् । रक्षाऽसि यज्ञऽहन्युः । वडित्याह ।
परोक्षमेव वषट्करोति । नास्य यातयामा वषट्कारो भवति ।
न यज्ञऽरक्षाऽसि घ्नन्ति । 63 (10)

T.A.8.7.7

स्वाहा॑ त्वा॑ सूर्य॑स्य रश्मये॑ वृष्टि॑वनये॑ जुहोमीत्याह॑ । यो वा अस्य॑
 पुण्यो॑ रश्मिः॑ । स वृष्टि॑वनिः॑ । तस्मा॑ एवैनम्॑ जुहोति॑ ।
 मधु॑ हविरसीत्याह॑ । स्वदय॑त्येवैनम्॑ । सूर्य॑स्य तपस्तपेत्याह॑ ।
 यथायजुरेवैतत्॑ । द्यावापृथिवी॑भ्याम् त्वा परिगृह्णामीत्याह॑ ।
 द्यावापृथिवी॑भ्या-मेवैनम्॑ परिगृह्णाति॑ । 64 (10)

T.A.8.7.8

अन्तरिक्षेण॑ त्वोपयच्छामीत्याह॑ । अन्तरिक्षेणैवैन-मुपयच्छति॑ ।
 न वा एतम्॑ मनुष्यो॑ भर्तुमर्हति॑ । देवानाम्॑ त्वा पितॄणामनुमतो॑
 भर्तुः॑ शक्रेयमित्याह॑ । देवैरेवैनम्॑ पितृभिरनुमत आदत्ते॑ ।
 वि वा एनमेतदर्द्धयन्ति॑ । यत् पश्चात् प्रवृज्य॑ पुरो जुह्वति॑ ।
 तेजोऽसि॑ तेजोऽनु प्रेहीत्याह॑ । तेज एवास्मिन् दधाति॑ ।
 दिविस्पृङ्मा॑ मा हिःसी-रन्तरिक्षस्पृङ्मा॑ मा हिःसीः पृथिवि॑
 स्पृङ्मा॑ मा हिःसीरित्याहाहिःसायै॑ । 65 (10)

T.A.8.7.9

सु॒वर॑सि सु॒व॒र्मे॑ य॒च्छ दि॒वं यँ॑च्छ दि॒वो मा॑ पा॒ही॒त्याह॑ ।
 आ॒शि॒ष॒मे॒वै॒ता॒मा॒शा॒स्ते॑ ॥ शि॒रो वा ए॒तद्-य॒ज्ञ॒स्य॑ । यत् प्र॒व॒र्ग्यः॑ ।
 आ॒त्मा वा॒युः॑ । उ॒द्य॒त्य वा॒तना॑मान्याह । आ॒त्म॒न्ने॒व य॒ज्ञ॒स्य॑ शि॒रः
 प्र॒ति॒द॒धा॒ति॑ । अ॒न॒वा॒न॒म् । प्रा॒णा॒नां॑ स॒न्त॒त्यै॑ । प॒ञ्चा॒ह॑ । 66 (10)

T.A.8.7.10

पा॒ङ्को॑ य॒ज्ञः । या॒वा॒ने॒व य॒ज्ञः॑ । त॒स्य॑ शि॒रः प्र॒ति॒द॒धा॒ति॑ । अ॒ग्न॒र्यै॑ त्वा
 व॒सु॒म॒ते॒ स्वा॒हे॒त्याह॑ । अ॒सौ वा आ॒दि॒त्यो॑ऽग्नि॒र्-व॒सु॒मा॒न् ।
 त॒स्मा ए॒वै॒न॒ञ्जु॑होति । सो॒मा॒य त्वा रु॒द्र॒व॒ते॑ स्वा॒हे॒त्याह॑ । च॒न्द्र॒मा वै
 सो॒मो रु॒द्र॒वा॒न् । त॒स्मा ए॒वै॒न॒ञ्जु॑होति । व॒रु॒णाय॑ त्वाऽऽदि॒त्य॒व॒ते
 स्वा॒हे॒त्याह॑ । 67 (10)

T.A.8.7.11

अ॒प्सु वै व॒रु॒ण आ॒दि॒त्य॒वा॒न् । त॒स्मा ए॒वै॒न॒ञ्जु॑होति । बृ॒ह॒स्प॒त॒ये॒ त्वा
 वि॒श्व॒दे॒व्या॒व॒ते॑ स्वा॒हे॒त्याह॑ । ब्र॒ह्म॒ वै दे॒वा॒ना॒म् बृ॒ह॒स्प॒तिः॑ ।
 ब्र॒ह्म॒ण ए॒वै॒न॒ञ्जु॑होति । स॒वि॒त्रे॒ त्व॒र्भु॑मते वि॒भु॒मते॑ प्र॒भु॒मते॑ वा॒ज॒व॒ते
 स्वा॒हे॒त्याह॑ । स॒म्वँ॒थ॒स॒रो वै स॒वि॒त॒र्भु॑मा॒न् । वि॒भु॒मा॒न् प्र॒भु॒मा॒न् ।

वाजवान् । तस्मा एवैनञ्जुहोति । यमाय त्वाऽङ्गिरस्वते पितृमते
स्वाहेत्याह । प्राणो वै यमोऽङ्गिरस्वान् पितृमान् । 68 (10)

T.A.8.7.12

तस्मा एवैनञ्जुहोति । एताभ्य एवैनम् देवताभ्यो जुहोति ।
दश सम्पद्यन्ते । दशाक्षरा विराट् । अन्नं विराट् ।
विराजैवान्नाद्यमवरुन्धे । रौहिणाभ्यां वै देवाः सुवर्गं लोकमायन् ।
तद्-रौहिणयो रौहिणत्वम् । यद्-रौहिणौ भवतः । रौहिणाभ्यामेव
तद्-यजमानः सुवर्गं लोकमेति () । अहर्ज्योतिः केतुना जुषताञ्
सुज्योतिर्ज्योतिषाञ् स्वाहा रात्रिर्ज्योतिः केतुना जुषताञ्
सुज्योतिर्ज्योतिषाञ् स्वाहेत्याह । आदित्यमेव तदमुष्मिन् लोकेऽहा
परस्ताद्-दाधार । रात्रिया अवस्तात् । तस्मादसावादित्यो ऽमुष्मिन्
लोकेऽहोरात्राभ्याम् धृतः । 69 (14)

(मनुष्यनामानि - पशवः - सीदत्वित्या - हेन्द्रायेत्याहा - ब्र्यति
- घ्नन्ति - गृह्णा - त्याहिऽसायै - पञ्चाहा - दित्यवते
स्वाहेत्याह - पितृमा - नेति चत्वारि च) (A7)

अनुवाकम् – 8

T.A.8.8.1

विश्वा आशा दक्षिणसदित्याह । विश्वानेव देवान् प्रीणाति । अथो
दुरिष्ट्या एवैनम् पाति । विश्वान् देवानयाडिहेत्याह । विश्वानेव देवान्
भागधेयेन समर्द्धयति । स्वाहाकृतस्य घर्मस्य मधोः पिबतमश्विनेत्याह ।
अश्विनावेव भागधेयेन समर्द्धयति । स्वाहाऽग्नये यज्ञियाय
शँयजुर्भिरित्याह । अभ्येवैनम् धारयति । अथो हविरेवाकः । 70 (10)

T.A.8.8.2

अश्विना घर्मम् पातञ् हर्दिवान-महर्दिवाभि-रूतिभिरित्याह ।
अश्विनावेव भागधेयेन समर्द्धयति । अनु वान् द्यावापृथिवी
मञ्सातामित्याहानुमत्यै । स्वाहेन्द्राय स्वाहेन्द्रा वडित्याह ।
इन्द्राय हि पुरो हूयते । आश्राव्याह घर्मस्य यजेति ।
वषट्कृते जुहोति । रक्षसामपहत्यै । अनुयजति स्वगाकृत्यै ।
घर्ममपातमश्विनेत्याह । 71 (10)

T.A.8.8.3

पूर्वमेवोदितम् । उत्तरेणाभिगृणाति । अनु वान्-द्यावापृथिवी
 अमञ्सातामित्याहानुमत्यै । तम् प्राव्यम् यथावण्णमो दिवे नमः
 पृथिव्या इत्याह । यथायजुरेवैतत् । दिवि धा इमं यज्ञं यज्ञमिमम्
 दिवि धा इत्याह । सुवर्गमेवैनम् लोकम् गमयति ।
 दिवम् गच्छान्तरिक्षम् गच्छ पृथिवीम् गच्छेत्याह ।
 एष्वेवैनम् लोकेषु प्रतिष्ठापयति । पञ्च प्रदिशो गच्छेत्याह । 72 (10)

T.A.8.8.4

दिक्ष्वेवैनम् प्रतिष्ठापयति । देवान् घर्मपान् गच्छ पितृन् घर्मपान्
 गच्छेत्याह । उभयैष्वेवैनम् प्रतिष्ठापयति । यत् पिन्वते । वर्षुकः
 पर्जन्यो भवति । तस्मात् पिन्वमानः पुण्यः । यत् प्राड्पिन्वते ।
 तद्-देवानाम् ॥ यद्-दक्षिणा । तत्-पितृणाम् । 73 (10)

T.A.8.8.5

यत् प्रत्यक् । तन्-मनुष्याणाम् । यदुदङ्ङ् । तद्-रुद्राणाम् ॥
 प्राञ्चमुदञ्चम् पिन्वयति । देवत्राऽकः । अथो खलु ।

सर्वा अनु दिशः पित्वयति । सर्वा दिशः समेधन्ते ।

अन्तःपरिधि पित्वयति । 74 (10)

T.A.8.8.6

तेजसोऽस्कन्दाय । इषे पीपिहूर्जे पीपिहीत्याह । इषमेवोर्जं यजमाने
दधाति । यजमानाय पीपिहीत्याह । यजमानायैवैता-माशिषमाशास्ते ।
मह्यञ्ज्यैष्ठ्याय पीपिहीत्याह । आत्मन एवैतामाशिषमाशास्ते ।
त्विष्यै त्वा द्युम्नाय त्वेन्द्रियाय त्वा भूत्यै त्वेत्याह । यथायजुरेवैतत् ।
धर्माऽसि सुधर्मा मे न्यस्मे ब्रह्माणि धारयेत्याह । 75 (10)

T.A.8.8.7

ब्रह्मन्नेवैनम् प्रतिष्ठापयति । नेत्वा वातः स्कन्दयादिति यद्यभिचरेत् ।
अमुष्य त्वा प्राणे सादयाम्यमुना सह निरर्थम् गच्छेति ब्रूयाद्-यम्
द्विष्यात् । यमेव द्वेष्टि । तेनैनञ् सह निरर्थम् गमयति । पूष्णे शरसे
स्वाहेत्याह । या एव देवता हुतभागाः । ताभ्य एवैनञ्जुहोति ।
ग्रावभ्यः स्वाहेत्याह । या एवान्तरिक्षे वाचः । 76 (10)

T.A.8.8.8

ताभ्य॑ ए॒वैन॑ञ्जुहोति । प्रति॑रेभ्यः॒ स्वाहे॑त्याह । प्राणा॑ वै दे॒वाः प्रति॑राः ।
 तेभ्य॑ ए॒वैन॑ञ्जुहोति । द्या॒वापृ॑थि॒वीभ्या॑ञ् स्वाहे॑त्याह ।
 द्या॒वापृ॑थि॒वीभ्या॑-मे॒वैन॑ञ्जुहोति । पितृ॑भ्यो॒ घर्म॑पेभ्यः॒ स्वाहे॑त्याह ।
 ये वै यज्वानः॑ । ते पित॑रो॒ घर्म॑पाः । तेभ्य॑ ए॒वैन॑ञ्जुहोति । 77 (10)

T.A.8.8.9

रु॒द्राय॑ रु॒द्रहो॑त्रे॒ स्वाहे॑त्याह । रु॒द्रमे॒व भा॑ग॒धेये॑न॒ सम॑र्द्धयति ।
 स॒र्वतः॑ स॒मन॑क्ति । स॒र्वत॑ ए॒व रु॒द्रन्नि॑रवदयते । उद॑ञ्च॒न्निर॑स्यति ।
 ए॒षा वै रु॒द्रस्य॑ दिक् । स्वा॒यामे॒व दि॒शि रु॒द्रन्नि॑रवदयते ।
 अ॒प उप॑स्पृशति॒ मेद्ध्य॑त्वाय । नान्॒वीक्षे॑त । यद॒न्वीक्षे॑त । 78 (10)

T.A.8.8.10

चक्षु॑रस्य॒ प्रमा॑युकञ् स्यात् । तस्मा॑न्ना॒न्वीक्ष्यः॑ । अ॒पीप॑रो माऽहो
 रा॒त्रियै॑ मा पा॒ह्येषा॑ ते॒ अग्ने॑ स॒मित्तया॑ स॒मिद्ध्य॑स्वा॒युर्मे॑ दा॒ वर्च॑सा
 माऽञ्जी॑रित्याह । आ॒युरे॒वास्मिन्॑ वर्चो॑ दधाति । अ॒पीप॑रो मा॒ रात्रि॑या
 अहो॑ मा पा॒ह्येषा॑ ते॒ अग्ने॑ स॒मित्तया॑ स॒मिद्ध्य॑स्वा॒युर्मे॑ दा॒ वर्च॑सा
 माऽञ्जी॑रित्याह । आ॒युरे॒वास्मिन्॑ वर्चो॑ दधाति । अ॒ग्निर्-ज्यो॑तिर्-

ज्योति॑रग्निः॒ स्वाहा॑ सूर्यो॒ ज्योति॑र्ज्योतिः॒ सूर्यः॑ स्वाहेत्याह ।

यथा॑यजु॒रेवै॑तत् । ब्र॒ह्मवा॑दि॒नो वद॑न्ति ।

होत॑व्यमग्निहो॒त्रा(३) न्न हो॑तव्या(३) मिति॑ । 79 (10)

T.A.8.8.11

यद्-यजु॑षा जुहु॒यात् । अय॑थापूर्वमाहु॒ती जुहु॑यात् । यन्न जुहु॒यात् ।

अग्निः॑ परा॒भवे॑त् । भूः स्वाहे॑त्येव हो॒तव्य॑म् । यथा॑पूर्वमाहु॒ती जुहो॑ति ।

नाग्निः॑ परा॒भवति॑ । हु॒तं ह॒विर्मधु॑ ह॒विरित्या॑ह । स्व॒दय॑त्ये॒वैन॑म् ।

इन्द्र॑तमे॒ऽग्नावित्या॑ह । 80 (10)

T.A.8.8.12

प्रा॒णो वा इन्द्र॑तमो॒ऽग्निः । प्रा॒ण ए॒वैन॑मिन्द्र॒तमे॒ऽग्नौ जुहो॑ति ।

पिता॑ नो॒ऽसि मा॑ मा॒ हि॒ऽसीरित्या॑हाहि॒ऽसायै॑ । अ॒श्याम॑ ते देव॒ घर्म॑

मधु॑मतो वाज॒वतः॑ पि॒तुमत॑ इत्याह । आ॒शिष॑मे॒वैता॑माशा॒स्ते ।

स्वधा॑वि॒नोऽशी॑महि॒ त्वा मा॑ मा॒ हि॒ऽसी-रित्या॑हाहि॒ऽसायै॑ ।

तेज॑सा वा ए॒ते व्यृ॑द्ध्यन्ते । ये प्र॒वर्ग्ये॑ण चरन्ति । प्रा॒श्नन्ति॑ ।

तेज॑ ए॒वात्मन्-द॑धते । 81 (10)

T.A.8.8.13

सम्॑व॒त्स॒रन्न॑ मा॒ञ्॒स॒म॑श्जीयात् । न॒ रा॒मा॒मु॒पे॒यात् । न॒ मृ॒न्म॒ये॒न॑ पि॒बेत् ।
नास्य॑ रा॒म उ॒च्छि॒ष्टम्॑ पि॒बेत् । ते॒ज ए॒व त॒त्स॒श॒यति॑ । दे॒वा॒सु॒राः
स॒म्य॑त्ता आ॒सन् । ते॒ दे॒वा वि॒ज॒य॒मु॒प॒यन्तः॑ । वि॒भ्रा॒जि॒ सौ॒र्ये॑ ब्र॒ह्म
स॒न्त्य॑द॒धत॑ । यत् किञ्च॑ दि॒वा॒की॒र्त्यम्॑ । तदे॒ते॒नै॒व व्र॑ते॒ना॒गो॒पा॒यत् () ।
तस्मा॑दे॒तद्-व्र॑तम् चा॒र्यम्॑ । ते॒ज॒सो गो॒पी॒था॒य । तस्मा॑दे॒तानि॑ यजू॒षि
वि॒भ्रा॒जः सौ॒र्य॑स्ये॒त्याहुः॑ । स्वाहा॑ त्वा सूर्य॑स्य रश्मि॒भ्य इति॑ प्रा॒तः
स॒ञ्सा॑द॒यति॑ । स्वाहा॑ त्वा नक्ष॑त्रे॒भ्य इति॑ सा॒यम् ।
ए॒ता वा ए॒तस्य॑ दे॒वताः॑ । ताभि॑रे॒वैन॑ञ् सम॒र्द्ध॑यति । 82 (17)

(अ॒क - रश्मि॑ने॒त्याह॑ - प्र॒दि॒शा॑ ग॒च्छे॒त्याह॑ - पि॒तृ॒णा - म॒न्तः
प॒रि॒धि पि॑न्व॒यति॑ - धा॒र॒ये॒त्याह॑ - वा॒चो॑ - ध॒र्म॒पा स्ते॑भ्य
ए॒वैन॑म् जु॒हो - त्य॒न्वी॑क्षे॒त - हो॒त॒व्या (3) मि - त्य॒ग्रा॒वि॒त्याह॑ -
द॒धते॑ - ऽगो॑पा॒यत् स॒प्त च॑) (A8)

अनुवाकम् - 9

T.A.8.9.1

घ॒र्म॒ या॒ ते॒ दि॒वि॒ शु॒गि॒ति॒ ति॒स्र॒ आ॒हु॒ती॒र्-जु॒हो॒ति॒ । छ॒न्दो॑भि॒रे॒वा॒स्यै॒भ्यो॒
लो॒के॒भ्यः॑ शु॒च॒म॒व॑ य॒ज॒ते॒ । इ॒य॒त्य॒ग्रे॑ जु॒हो॒ति॒ । अ॒थे॒य॒त्य॒थे॒य॒ति॒ ।
त्र॒य॒ इ॒मे॒ लो॒काः॑ । ए॒भ्य॒ ए॒व॒ लो॒के॒भ्यः॑ शु॒च॒म॒व॑ य॒ज॒ते॒ ।
अ॒नु॒ नो॒ऽद्या॒नु॒म॒ति॒रि॒त्या॒हा॒नु॒म॒त्यै॑ । दि॒व॒स्त्वा॒ पर॒स्पा॒या॒ इ॒त्या॒ह॑ । दि॒व॒
ए॒वे॒मा॒न् लो॒का॒न् दा॒धा॒र॑ । ब्र॒ह्म॒ण॒स्त्वा॒ पर॒स्पा॒या॒ इ॒त्या॒ह॑ । 83 (10)

T.A.8.9.2

ए॒ष्वे॒व॒ लो॒के॒षु॑ प्र॒जा॒ दा॒धा॒र॑ । प्रा॒ण॒स्य॑ त्वा॒ पर॒स्पा॒या॒ इ॒त्या॒ह॑ ।
प्र॒जा॒स्वे॒व॒ प्रा॒णा॒न् दा॒धा॒र॑ । शि॒रो॒ वा॒ ए॒तद्-य॒ज्ञ॒स्य॑ ।
यत् प्र॒व॒र्ग्यः॑ । अ॒सौ॒ ख॒लु॒ वा॒ आ॒दि॒त्यः॑ प्र॒व॒र्ग्यः॑ । तं॑ यद्-द॒क्षि॒णा
प्र॒त्य॒ञ्च॑-मु॒द॒ञ्च॑-मु॒द्वा॒स॒ये॒त् । जि॒ह्वां॑ य॒ज्ञ॒स्य॑ शि॒रो॒ ह॒रे॒त् ।
प्रा॒ञ्च॑मु॒द्वा॒स॒य॒ति॒ । पु॒र॒स्ता॑दे॒व॒ य॒ज्ञ॒स्य॑ शि॒रः॑ प्र॒ति॒द॒धा॒ति॒ । 84 (10)

T.A.8.9.3

प्रा॒ञ्च॑मु॒द्वा॒स॒य॒ति॒ । तस्मा॑द॒सा॒वा॒दि॒त्यः॑ पु॒र॒स्ता॑दु॒दे॒ति॒ ।
श॒फो॒प॒य॒मा॒न्ध॒वि॒त्रा॒णि॒ धृ॒ष्टी॑ इ॒त्य॒न्व॒व॒ह॒र॒न्ति॑ ।

सा॒त्मान॑मे॒वैन॑ꣳ स॒तनु॑म् करोति । सा॒त्माऽमु॑ष्मिन् लो॒के भ॑वति ।
य ए॒वं वे॑द । औ॒दुम्ब॑राणि भवन्ति । ऊ॒र्वा उ॑दुम्ब॒रः ।
ऊ॒र्जमे॑वाव॒रुन्धे॑ । वर्त्म॑ना वा अ॒न्वित्य॑ । 85 (10)

T.A.8.9.4

य॒ज्ञꣳ र॒क्षाꣳसि॑ जिघाꣳसन्ति । साम्ना॑ प्र॒स्तोताऽन्व॑वैति ।
सा॒म वै र॑क्षोहा । र॒क्षसा॑मप॒हत्यै॑ । त्रि॒र्निध॑नमु॒पैति॑ । त्रय॑ इ॒मे लो॒काः ।
ए॒भ्य ए॒व लो॒केभ्यो॑ र॒क्षाꣳस्य॑प॒हन्ति॑ । पु॒रुषः॑पु॒रुषो॑ नि॒धन॑मु॒पैति॑ ।
पु॒रुषः॑पु॒रुषो॑ हि र॒क्षस्वी॑ । र॒क्षसा॑मप॒हत्यै॑ । 86 (10)

T.A.8.9.5

यत् पृ॒थि॒व्यामु॑द्वास॒येत्॑ । पृ॒थि॒वीꣳ शु॒चाऽर्प॑येत् । यद॒प्सु॑ ।
अपः॑ शु॒चा॒र्पयेत्॑ । यदोष॑धीषु । ओष॑धीः शु॒चाऽर्प॑येत् ।
यद्-व॒न॒स्पति॑षु । व॒न॒स्पतीꣳशु॒चाऽर्प॑येत् । हि॒रण्य॑न्नि॒धायो॑द्वास॒यति॑ ।
अ॒मृतं॑ वै हि॒रण्य॑म् । 87 (10)

T.A.8.9.6

अ॒मृत॑ ए॒वैन॑म् प्र॒तिष्ठा॑पयति । व॒ल्गुर॑सि शं यु॒धाया॑ इति त्रिः
प॒रिषि॑ञ्च॒न्यर्ये॑ति । त्रि॒वृद्वा॑ अ॒ग्निः॑ । या॒वा॒ने॒वाग्निः॑ ।

तस्य शुचं शमयति । त्रिः पुनः पर्येति । षट्थं सम्पद्यन्ते ।

षड्वा ऋतवः । ऋतुभिरेवास्य शुचं शमयति ।

चतुः सक्तिर्नाभिर्. ऋतस्येत्याह । 88 (10)

T.A.8.9.7

इयं वा ऋतम् । तस्या एष एव नाभिः । यत् प्रवर्ग्यः । तस्मादेवमाह ।

सदो विश्वायुरित्याह । सदो हीयम् । अप द्वेषो अप ह्वर इत्याह

भ्रातृव्यापनुत्यै । घर्मेतत्तेऽन्नमेतत् पुरीषमिति दद्धना मधुमिश्रेण

पूरयति । ऊर्वा अन्नाद्यन्दधि । ऊर्जेवैनमन्नाद्येन समर्द्धयति । 89 (10)

T.A.8.9.8

अनशनायुको भवति । य एवं वेद । रन्तिर्नामासि दिव्यो गन्धर्व

इत्याह । रूपमेवास्यै-तन्-महिमानं रन्तिम् बन्धुतां व्याचष्टे ।

समहमायुषा सम् प्राणेनेत्याह । आशिषमेवैतामाशास्ते ।

व्यसौ योऽस्मान् द्वेष्टि यञ्च वयम् द्विष्म इत्याह । अभिचार

एवास्यैषः । अचिक्रदद्-वृषा हरिरित्याह । वृषा ह्येषः । 90 (10)

T.A.8.9.9

वृषा हरिः । महान्-मित्रो न दर्शत इत्याह । स्तौत्येवैनमेतत् ।
चिदसि समुद्रयोनिरित्याह । स्वामेवैनं योनिङ्गमयति । नमस्ते अस्तु
मा मा हिंसीरित्याहाहिंसायै । विश्वावसुं सोमगन्धर्वमित्याह ।
यदेवास्य क्रियमाणस्यान्तर्यन्ति । तदेवास्यैतेनाप्याययति ।
विश्वावसुरभि तन्नो गृणात्वित्याह । 91 (10)

T.A.8.9.10

पूर्वमेवोदितम् । उत्तरेणाभिगृणाति । धियो हिन्वानो धिय इन्नो
अव्यादित्याह । ऋतूनेवास्मै कल्पयति । प्रासाम् गन्धर्वो अमृतानि
वोचदित्याह । प्राणा वा अमृताः । प्राणानेवास्मै कल्पयति ।
एतत्त्वन्देव घर्म देवो देवानुपागा इत्याह । देवो ह्येष सन्देवानुपैति ।
इदमहम् मनुष्यो मनुष्यानित्याह । 92 (10)

T.A.8.9.11

मनुष्यो हि । एष सन्-मनुष्यानुपैति । ईश्वरो वै प्रवर्ग्यमुद्वासयन् ।
प्रजाम् पशून्थ सोमपीथमनूद्वासः सोमपीथानुमेहि । सह प्रजया
सह रायस्पोषेणेत्याह । प्रजामेव पशून्थ सोमपीथमात्मन् धत्ते ।

सु॒मि॒त्रा न॒ आप॒ ओष॑धयः सन्त्वित्याह । आशि॑षमेवैतामाशास्ते ॥
दु॒र्मि॒त्रास्तस्मै॑ भूयासु॒र्-योऽस्मान्-द्वेष्टि॑ यञ्च वयम् द्विष्म॑ इत्याह ।
अभि॒चार॒ एवा॒स्यैषः॑ () । प्र वा ए॒षोऽस्मान् लो॒काच्च्य॑वते ।
यः प्र॒वर्ग्य॑मुद्वासयति । उ॒दु॒ त्यम् चि॒त्रमि॑ति सौरी॑भ्यामृ॒ग्भ्याम् पु॒नरे॒त्य
गा॒र्ह॒पत्ये॑ जुहोति । अय॑ वै लोको गा॒र्ह॒पत्यः॑ । अ॒स्मिन्ने॒व लो॒के
प्रति॑तिष्ठति । असौ॑ खलु॒ वा आ॒दित्यः॑ सु॒वर्गो॑ लो॒कः ।
यथ् सौरी॑ भवतः । तेनै॒व सु॒वर्गान् लो॒कान्नै॑ति । 93 (18)

(ब्रह्मण॑स्त्वा पर॒स्याया॑ इत्याह - दधा - त्यन्वित्य॑ - रक्ष॑स्वी रक्ष॑सा
मप॑हत्यै - वै हिर॑ण्य - माहा - र्द्धयति॑ - ह्येष॑ - गृणा॑त्वित्याह -
मनु॑ष्यानित्याहा - स्यैषो॑ ऽष्टौ च) (A9)

अनुवाकम् - 10

T.A.8.10.1

प्र॒जाप॑तिं वै दे॒वाः शु॒क्रम् प॑योऽदु॒हन् । तदे॑भ्यो न व्यभवत् ।
तद॒ग्निर्व्य॑करोत् । तानि॑ शु॒क्रिया॑णि सामान्य॑भवन् ।
तेषां॑ यो रसोऽत्य॑क्षरत् । तानि॑ शु॒क्रय॑जू॒ष्यभ॑वन् ।

शुक्रियाणां वा एतानि शुक्रियाणि । सामपयसम्वा एतयोरन्यत् ।
देवानामन्यत्पयः । यद्गोः पयः । 94 (10)

T.A.8.10.2

तथ् साम्नः पयः । यदजायै पयः । तद्-देवानाम् पयः । तस्माद्-
यत्रैतैर्-यजुर्भिश्चरन्ति । तत् पयसा चरन्ति । प्रजापतिमेव
तद् देवान्यपयसाऽन्नाद्येन समर्द्धयन्ति । एष ह त्वै साक्षात् प्रवर्ग्यम्
भक्षयति । यस्यैवं विदुषः प्रवर्ग्यः प्रवृज्यते ॥ उत्तरवेद्या-मुद्वासयेत्-
तेजस्कामस्य । तेजो वा उत्तरवेदिः । 95 (10)

T.A.8.10.3

तेजः प्रवर्ग्यः । तेजसैव तेजः समर्द्धयति । उत्तरवेद्या-
मुद्वासये-दन्नकामस्य । शिरो वा एतद्-यज्ञस्य । यत् प्रवर्ग्यः ।
मुखमुत्तरवेदिः । शीर्ष्णैव मुखं सन्दधात्यन्नाद्याय । अन्नाद एव
भवति । यत्र खलु वा एतमुद्वासितं वयांसि पर्यासते ।
परि वै तां समां प्रजा वयांस्यासते ॥ 96 (10)

T.A.8.10.4

तस्मा॑-दु॒त्तर॑वे॒द्या-मे॒वो॒द्वास॑येत् । प्र॒जाना॑म् गो॒पी॒थाय॑ ।
 पु॒रो वा प॒श्चाद्दो॑द्वासयेत् । पु॒रस्ता॑द्वा ए॒तज्ज्यो॑तिरु॒देति॑ ।
 तत् प॒श्चान्नि॑म्रो॒चति॑ । स्वा॒मे॒वैन॑म् यो॒निम॑नूद्वासयति ।
 अ॒पाम् म॑द्ध्य उ॒द्वास॑येत् । अ॒पां वा ए॒तन्म॑द्ध्य-ज्ज्यो॑तिरजायत ।
 ज्यो॑तिः प्र॒वर्ग्यः॑ । स्व ए॒वैनं॑ यो॒नौ प्र॑तिष्ठापयति । 97 (10)

T.A.8.10.5

यम् द्वि॒ष्यात् । यत्र॑ स स्यात् । तस्या॑म् दि॒शुद्वास॑येत् । ए॒ष वा
 अ॒ग्निर्-वै॑श्वा॒नरः॑ । यत्-प्र॒वर्ग्यः॑ । अ॒ग्नि॒नै॒वैनं॑ वै॒श्वा॒नरे॑णाभि
 प्र॒वर्त॑यति । औ॒दु॒म्ब॒र्यां शा॒खाया॑मुद्वासयेत् । ऊ॒र्वा उ॒दु॒म्ब॒रः ।
 अ॒न्नम् प्रा॑णः । शु॒ग्ध॒र्मः । 98 (10)

T.A.8.10.6

इ॒दम॑ह-ममु॒ष्यामु॒ष्याय॑णस्य शु॒चा प्रा॑णमपि द॒हामी॑त्याह । शु॒चैवा॑स्य
 प्रा॑णमपि द॒हति॑ । ता॒जगा॑र्तिमा॒र्च्छति॑ । यत्र॑ द॒र्भा उप॑दीक॒सन्तताः॑
 स्युः । तदु॒द्वास॑येद्-वृ॒ष्टिका॑मस्य । ए॒ता वा अ॒पाम॑नू॒ज्झाव॑र्यो॒ नाम॑ ।
 यद्-द॒र्भाः । अ॒सौ ख॒लु वा आ॑दित्य इ॒तो वृ॒ष्टिमु॑दीरयति ।

असावेवास्मा आदित्यो वृष्टिन्नियच्छति । ता आपो नियता धन्वना
यन्ति () । 99 (10) (गोः पय - उत्तरवेदि - रासते - स्थापयति -
घर्मो - यन्ति) (A10)

अनुवाकम् - 11

T.A.8.11.1

प्रजापतिः सम्भ्रियमाणः । सम्राट्थ् सम्भृतः । घर्मः प्रवृक्तः ।
महावीर उद्वासितः । असौ खलु वावैष आदित्यः । यत् प्रवर्ग्यः ।
स एतानि नामान्यकुरुत । य एवं वेद । विदुरेनन्नाम्ना ।

ब्रह्मवादिनो वदन्ति । 100 (10)

T.A.8.11.2

यो वै वसीयाञ् सम्यथानाममुपचरति । पुण्यार्तिं वै स तस्मै
कामयते । पुण्यार्तिमस्मै कामयन्ते । य एवं वेद । तस्मादेवं विद्वान् ।
घर्म इति दिवाऽऽचक्षीत । सम्राडिति नक्तम् । एते वा एतस्य प्रिये
तनुवौ । एते अस्य प्रिये नामनी । प्रिययैवैनम् तनुवा । 101 (10)

T.A.8.11.3

प्रि॒येण॑ ना॒म्ना॒ सम॑र्द्धयति । की॒र्तिर॑स्य पूर्वा गच्छति जनतामायतः ।
गा॒यत्री॑ दे॒वेभ्यो॑ऽपाक्रामत् । ता॒न्दे॒वाः प्र॑वर्ग्येणैवानु व्यभवन् ।
प्र॒वर्ग्ये॑णाप्नुवन् । यच्च॑तुर्वि॒ंशतिः॑ कृत्वः प्रवर्ग्यम् प्रवृणक्ति ।
गा॒यत्री॑मेव तदनु विभवति । गा॒यत्री॑माप्नोति । पूर्वा॑ऽस्य॒ जनं॑ यतः
की॒र्तिर्गच्छति॑ । वै॒श्वदे॒वः स॑ऽसन्नः । 102 (10)

T.A.8.11.4

वस॑वः प्रवृक्तः । सोमो॑ऽभिकीर्यमाणः । आ॒श्विनः॑ पयस्यानीयमाने ।
मा॒रुतः॑ क्वथन् । पौ॒ष्ण उद॑न्तः । सा॒रस्व॑तो विष्यन्दमानः ।
मै॒त्रः शरो॑ गृहीतः । तेज॑ उद्यतो वायुः । ह्रि॒यमा॑णः प्रजापतिः ।
हू॒यमा॑नो वाग्धुतः । 103 (10)

T.A.8.11.5

असौ॑ खलु वावैष आ॒दित्यः॑ । यत् प्र॑वर्ग्यः । स ए॒तानि॑ नामान्यकुरुत ।
य ए॒वं वैद॑ । विदु॑रेनन्नाम्ना । ब्र॒ह्मवा॑दिनो वदन्ति । यन्मृ॑न्मय-
माहु॑तिन्नाश्नुतेऽथ । कस्मा॑देषोऽश्नुत इति । वा॒गेष॑ इति ब्रूयात् ।
वा॒च्ये॒व वा॒चम् द॑धाति । 104 (10)

T.A.8.11.6

तस्मादश्नुते । प्रजापतिर्वा एष द्वादशधा विहितः । यत् प्रवर्ग्यः ।
यत् प्रागवकाशेभ्यः । तेन प्रजा असृजत । अवकाशैर्-
देवासुरानसृजत । यदूर्ध्वमवकाशेभ्यः । तेनान्नमसृजत ।
अन्नम् प्रजापतिः । प्रजापतिर्वावैषः () । 105 (10)

(वदन्ति - तनुवा - स॒सन्नो - हूयमानो वाग्धुतो - दधा -
त्येषः (A11))

अनुवाकम् - 12

T.A.8.12.1

सविता भूत्वा प्रथमेऽहन् प्रवृज्यते । तेन कामाँ एति ।
यद्-द्वितीयेऽहन्-प्रवृज्यते ॥ अग्निर्-भूत्वा देवानेति ।
यत्-तृतीयेऽहन्-प्रवृज्यते ॥ वायुर्-भूत्वा प्राणानेति । यच्चतुर्थेऽहन्-
प्रवृज्यते ॥ आदित्यो भूत्वा रश्मीनेति । यत् पञ्चमेऽहन्-प्रवृज्यते ।
चन्द्रमा भूत्वा नक्षत्राण्येति । 106 (10)

T.A.8.12.2

यथ्-षष्ठेऽहन्-प्रवृज्यते ॥ ऋतुर्-भूत्वा सम्वत्सरमेति ।
यथ्-सप्तमेऽहन्-प्रवृज्यते ॥ धाता भूत्वा शक्वरीमेति ।
यदष्टमेऽहन्-प्रवृज्यते ॥ बृहस्पतिर्-भूत्वा गायत्रीमेति ।
यन्-नवमेऽहन्-प्रवृज्यते ॥ मित्रो भूत्वा त्रिवृत इमां लोकानेति ।
यद्-दशमेऽहन्-प्रवृज्यते ॥ वरुणो भूत्वा विराजमेति । 107 (10)

T.A.8.12.3

यदेकादशेऽहन्-प्रवृज्यते ॥ इन्द्रो भूत्वा त्रिष्टुभमेति ।
यद्-द्वादशेऽहन्-प्रवृज्यते ॥ सोमो भूत्वा सुत्यामेति ।
यत्-पुरस्तादुपसदाम् प्रवृज्यते ॥ तस्मादितः पराङ्मूं
ल्लोकाऽस्तपन्नेति । यदुपरिष्ठा-दुपसदाम् प्रवृज्यते ॥
तस्मादमुतोऽर्वाङ्निमां लोकऽस्तपन्नेति । य एवं वेद ।
एव तपति () । 108 (10)

(नक्षत्राण्येति - विराजमेति - तपति) (A12)

Prapaataka Korvai with starting Padams of 1 to 12 Anuvaakams :-

दे॒वा वै स॒त्रꣳ – सा॒वि॒त्रम् – परि॒श्रि॒ते – ब्र॒ह्मन् प्र॒च॒रि॒ष्या॒मो –
ऽग्नि॑ष्ट्वा – शि॒रो ग्री॒वा – दे॒वस्य॑ र॒शनां॑ – वि॒श्वा आ॒शा –
ध॒र्म या ते॑ – प्र॒जाप॑तिꣳ शु॒क्रम् – प्र॒जाप॑तिः स॒म्भ्रि॑यमाणः –
स॒वि॒ता भू॒त्वा द्वा॒दश॑)

Korvai with starting Padams of 1, 11, 21 Series of Dasinis :-

(दे॒वा वै स॒त्रꣳ – स ख॑दि॒रः – परि॒श्रि॒ते – ऽभि॑पूर्व – म॒थो
र॒क्ष॒साम् – ग्रै॒ष्मा॒वे॒वा॒स्मै – ब्र॒ह्म वै दे॒वा॒ना – म॒श्वि॒ना घ॒र्मम्
पा॒तम् – प्रा॒णो वै – वृ॒षा ह॒रिर् – यो वै व॑सी॒याꣳ स॒म्य॑थानाम
म॒ष्टौत्त॑रशतम्)

First and Last Padam in TA, 8th Prapaatakam :-

(दे॒वा वै स॒त्र – मै॒व त॑पति)

। हरिः॑ ओम् ।

। कृष्ण यजुर्वेदीय तैत्तिरीय आरण्यके अष्टमः प्रपाठकः समाप्तः ।

। इति तैत्तिरीय यजुरारण्यकम् समाप्तम् ।

=====

Details of Dasini&Vaakyams for – Prapaatakam No.8 – (TA 8)

	Dasini	Vaakyams
Anuvakam 1	7	77
Anuvakam 2	13	138
Anuvakam 3	9	98
Anuvakam 4	13	132
Anuvakam 5	3	38
Anuvakam 6	12	124
Anuvakam 7	12	124
Anuvakam 8	13	137
Anuvakam 9	11	118
Anuvakam 10	6	60
Anuvakam 11	6	60
Anuvakam 12	3	30
Total →	108	1136

For Full Aranyakam

	Anuvaakam	Dasini	Vaakyam
Prapaatakam1	32	130	1396
Prapaatakam2	20	20	117
Prapaatakam3	21	53	501
Prapaatakam4	12	27	280
Prapaatakam5	15	44	634
Prapaatakam6	80	101	579
Prapaatakam7	42	94	840
Prapaatakam8	12	108	1136
Total →	234	577	5483